

四庫全書

史部

欽定四庫全書

欽定續通志卷二百十五

列傳

唐十五

傅奕

呂才

陳子昂

王無競  
趙元

傅奕相州鄴人隋開皇中以儀曹事漢王諒諒反問奕  
今茲熒惑入井果若何對曰東井黃道所由熒惑之舍  
烏足怪邪若入地上井乃為災諒怒俄及敗奕以對免

徙扶風高祖為扶風太守禮之及即位拜太史丞會令  
庾儉以父質言占候忤煬帝死懲其事恥以術宦薦奕  
自代奕遷令與儉同列數排毀之儉不為恨於是人多  
儉仁厚而稱奕之率直時國制草創多仍隋舊奕謂承  
亂世之後當有變更請改正朔易服色變律令革官名  
太僕卿張道源建言官曹文簿繁總易欺請減之以鈐  
吏姦公卿舉不為然奕獨是之為眾沮訛不得行武德  
七年上疏極詆浮圖法曰西域之法無君臣父子以三

塗六道嚇愚欺庸迫既往之罪窺將來之福至有身陷  
惡逆獄中禮佛口誦梵言以圖偷免且生死壽夭本諸  
自然刑德威福繫之人主今其徒矯託皆云由佛攘天  
理竊主權書曰惟辟作福惟辟作威惟辟玉食臣有作  
福作威玉食害于而家凶于而國五帝三王未有佛法  
君明臣忠年祚長久至漢明帝始立佛祠然惟西域桑  
門自傳其教西晉以上不許中國髡髮事佛至石苻亂  
華乃弛厥禁主庸臣佞政虐祚短事佛致然梁武齊襄

尤足為戒昔褒姒一女營惑幽王能亡其國況今僧尼  
十萬刻繪泥像以惑天下有不亡乎陛下以十萬之衆  
自相夫婦十年滋產十年教訓兵農兩足利可勝既邪  
昔高齊章仇子他言僧尼塔廟外見毀宰臣內見疾妃  
嬙陽讒陰謗卒死都市周武帝入齊封寵其墓臣竊賢  
之又上十二論言益痛切帝下奕議有司唯道源佐其  
請中書令蕭瑀曰佛聖人也非聖人者無法請誅之奕  
曰禮始事親終事君而佛逃父出家以匹夫抗天子以

繼體悖所親瑀非出空桑乃尊其言蓋所謂非孝者無  
親瑀不答但合掌曰地獄正為人設矣帝善弈對未  
及行會傳位止初九年太白躔秦分弈奏秦王當有天  
下帝以奏付王及太宗即位召賜食謂曰向所奏幾敗  
我雖然自今毋有所諱而不盡言又嘗問卿拒佛法奈  
何弈曰佛西方點人爾欺誅愚民以自神至入中國而  
熾兒幻夫摸象莊老以文飾之有害國家而無補百姓

也帝異之

按通鑑云時有西域僧善呪術能令人立死  
復呪令蘇屢試皆驗弈請試之竟無所覺僧

金剛經卷第二  
旋僵仆遂不復蘇益邪不勝正理或有之然  
新舊書本傳並不載其事今亦不復採入

貞觀十三

年卒年八十五遺言戒其子習六經名教言勿為妖妄  
之法死當保葬亦雖善數然嘗自言其學不可以傳又  
注老子并集晉魏以來與佛議駁者為高識篇武德時  
改漏刻法及十二軍號皆奕所定云

呂才博州清平人貞觀時祖孝孫增損樂律與音家王  
長通白明達更質難不能決太宗詔侍臣舉善音者中  
書令溫彥博白才天悟絕人聞見一接輒究其妙侍中

王珪魏徵盛稱才製尺八凡十二枚長短不同與律諧  
契即召才直弘文館參論樂事帝嘗覽周武帝三局象  
經不能通或言太子洗馬蔡允恭能之召問允恭少通  
其略老乃忘試問才退一昔即解具圖以聞允恭記其  
舊與才正同由是知名擢累太常博士帝病陰陽家所  
傳書多謬偽淺惡世益拘畏命才與宿學老師刪落煩  
訛掇可用者為五十三篇合舊書四十七凡百篇詔頒  
天下才於持議儒而不俚推本經誼以救俗失辭指明



切有益時事故剗其三篇卜宅篇曰詩稱相其陰陽書云惟洛食卜宅吉凶其來尚矣至於近世乃有五姓之說謂宮商角徵羽天下萬物悉配屬之以處吉凶然言皆不類如張王為商武庚為羽是以音相諧附至柳為宮趙為角則又不然其間一姓而兩屬復姓數字不得所歸是直野人巫師說爾按堪輿經黃帝對天老始言五姓且黃帝時獨姬姜數姓耳後世賜族者寢多管蔡邴霍魯衛毛聃郤雍曹滕畢原鄆郇本之姬姓孔殷宋

華向蕭毫皇甫本之子姓至因官命氏因邑賜族本同  
末異巨為配宮商哉春秋以陳衛秦為水姓齊鄭宋為  
火姓或所出之祖所分之星所居之地以著由來非宮  
商角徵羽相管攝也祿命篇曰漢宋忠賈誼譏司馬季  
主曰卜筮者高人祿命以悅人心矯言禍福以規人財  
王充曰見骨體知命祿見命祿知骨體此則祿命之書  
行之已久推索本原固不其然積善之家必有餘慶豈  
建祿而後吉乎積惡之家必有餘殃豈劫殺而後災乎

學也祿在其中不必生當建學文王憂勤損壽初非月  
值空亡長平坑降卒非俱犯三刑南陽多近親非俱當  
六合歷陽成湖不共河魁蜀郡炎火不盡災厄世有同  
建與祿而貴賤殊域共命若胎而夭壽異科魯桓公六  
年七月莊公生按歷歲在乙亥月建申然則值祿空亡  
據法應窮賤又觸句絞六害借驛馬身剋驛馬三刑法  
無官火命七月生當病鄉法曰為人尪弱矬陋而詩言  
莊公曰猗嗟昌兮頎而長兮美目揚兮巧趨蹌兮唯向

命一物法當壽而公薨止四十五一不驗秦莊襄王四十八年始皇帝生以正月故名政是歲壬寅正月命偕祿於法無官假得祿奴婢應少又破驛馬三刑身剋驛馬法望官不到金命正月生當絕為人無始有終老而吉又建命生法當壽帝崩時不過五十二不驗漢武帝以乙酉歲七月七日平旦生當祿空亡於法無官雖向驛馬乃隔四辰法少無官老而吉武帝即位年十六末年戶口減耗三不驗後魏高祖孝文皇帝生皇興元年

八月是歲丁未為僭祿命與驛馬三刑身剋驛馬於法  
無官又生父死中法不見父而孝文受其父顯祖之禪  
禮君未踰年不得正位故天子無父事三老也孝文受  
禪異於常禮躬率天下以事其親而法不合識父四不  
驗宋高祖癸亥三月生祿與命皆空亡於法無官又生  
子墓中法宜嫡子雖有次子當早卒而高祖長子先被  
弑次子義隆享國又生祖祿下法得嫡孫財若祿其孫  
劬濟皆篡逆幾失宗祧五不驗葬篇曰經曰葬者藏也

欲人之弗得見也又曰卜其宅兆而安厝之朝市貿遷不可知泉石頽齧不可常是以謀及卜筮庶無後艱斯則備於慎終之禮也後代葬說出于巫史或選年月便利或量墓田遠近一物有失便謂災及死生多為妨禁以售其術附妄憑妖至有百二十家春秋王者七日而殯七月而葬諸侯五日而殯五月而葬大夫三月士庶人逾月貴賤不同禮亦異數故先期而葬謂之不懷後期不葬謂之殆禮此則葬有定期不擇年與月一也又

曰丁巳葬定公雨不克葬至于戊午襄事君子善之禮  
卜葬先遠日者自末而進避不懷也今葬書以巳亥日  
最凶謹按春秋是日葬者凡有二十餘件此葬不擇日  
二也禮周尚赤大事用旦殷尚白大事用日中夏尚黑  
大事用昏大事者何喪葬也此直取當代所尚而不擇  
時早晚也子產及子太叔葬鄭簡公於是司墓大夫室  
當柩路若壞其室即平旦而塋不壞其室即日中而塋  
子產不欲壞室欲待日中子太叔曰若日中而塋恐久

勞諸侯大夫來會葬者此惟論人事可否不問時之得失也曾子曰葬逢日蝕舍於路左待明而行所以備非常也依舊書多取乾艮二時乃近夜半今推檢禮傳葬不擇時三也葬書以官爵富貴年壽修促子姓蕃衍皆葬之所致易曰聖人之大寶曰位何以守位曰仁書曰立功立事可以永年未聞捨人事而責地形臧孫有後于魯不聞葬得吉也若教絕嗣於荆不聞葬得凶也此葬有吉凶不可信四也今葬法皆據五姓便利而古之



葬並在國都之北趙氏之葬在九原漢家山陵或散處諸域又何上利下利大墓小墓為哉然劉之子孫本支不絕趙後與六國等王此則葬用五姓不可信五也且人有初賤而後貴始泰而終否者子文為令尹三仕三已展禽三黜於士師彼冢墓已定而不改此名位不常何也故知榮辱升降不由於葬六也世之人為葬巫所欺忘擗踊荼毒以期徼幸於是相塋隴希官爵擇日時規財利謂辰日不哭遂欣然而受弔謂同屬不得臨塋

乃吉服不送其親詭數禮俗不可以法七也帝又詔造  
方域圖及教飛騎戰陳圖屢稱旨擢太常丞麟德中以  
太子司更大夫卒生平預修書及著述甚多子方毅七  
歲能誦經太宗聞其敏召見奇之賜束帛長為右衛鎧  
曹參軍母喪以毀卒布車從母葬通人郎餘令以白粥  
玄酒生芻祭路隅世共哀之

陳子昂字伯玉梓州射洪人家世富豪年十八未知書  
他日入鄉校感憤痛自修飭文明初舉進士時高宗崩

將遷梓宮長安於是關中無歲子昂盛言東都勝塏可  
營山陵上書曰臣聞秦據咸陽漢都長安山河為固而  
天下服者以北假胡宛之利南資巴蜀之饒轉關東之  
粟而收山西之儲故能長羈利策橫制宇宙今則不然  
燕代迫匈奴巴隴嬰吐蕃秦之首尾不完所餘獨三輔  
間耳頃遭荒饉百姓荐飢薄河而右惟有赤地循隴以  
北不逢青草父兄轉徙妻子流離賴天悔禍去年薄稔  
羸耗之餘得保性命然流亡未還阡陌無主至於蓄積

尤可哀傷陛下以先帝遺意方欲長驅大駕按節西京  
千乘萬騎何從仰給山陵穿復必資徒役率癯瘠之衆  
興數萬之軍調發近畿督扶稚老鑿山輦石驅以就功  
春作無時秋成絕望彫眊遺噍再罹艱苦有不堪其困  
則逸為盜賊揭挺叫噉可不深圖哉且天子以四海為  
家舜葬蒼梧禹葬會稽豈愛夷裔而鄙中國耶示無外  
也周平王漢光武都洛而山陵寢廟並在西土者實以  
時有不可故遺小存大去禍取福也今景山崇秀北對

嵩邛右眄汝海祝融太昊之故墟在焉園陵之美復何以加且太原廩鉅萬之倉洛口儲天下之粟乃欲捨而不顧儻鼠竊狗盜西入陝郊東犯虎牢取敖倉一抔粟陞下何與過之武后奇其才名見金華殿擢麟臺正字垂拱初條上利害三事其一言九道出大使巡按天下申黜陟求人瘼臣謂計有未盡也且陛下發使欲使百姓知天子夙夜憂勤之也羣臣知考績而任之也姦暴不逞知將除之也則莫如擇仁可以恤孤明可以振滯

剛可以折彊禦者然後為之故輜軒未動而天下翹然  
待之矣今使且未出道路之人皆已指笑欲望進賢下  
不肖豈可得邪宰相奉詔書有遣使之名無任使之實  
使愈出天下愈敝徒令百姓治道路送往迎來不見其  
益其二言刺史縣令政教之首陛下布德澤下詔書必  
待刺史縣令謹宣而奉行之不得其人則委棄有司掛  
牆屋耳故宰相者陛下之腹心刺史縣令者陛下之手  
足國家興衰在此職也今吏部調縣令如補一尉但計

資考不求賢良有如不次用人則天下囂然相謗故庸人任職教化陵遲欲興太平宜革斯弊其三言天下有危機禍福因之而生機靜則有福動則有禍今軍旅之弊夫妻不得安父子不相養五六年矣自劍南盡河隴山東由青徐曹汴河北舉滄瀛趙鄭或困水旱或頓兵疫死亡流離略盡尚賴陛下憫其失職凡兵戍調發一切罷之使人得妻子相見父兄相保可謂能靜其機也然臣恐將相有貪邊陲利以廣地疆武說陛下者欲動

其機機動則禍構宜修文德去刑罰勸農桑以息疲民  
于時吐蕃九姓叛詔田揚名發金山道十姓兵討之十  
姓君長以三萬騎戰有功遂請入朝后責其嘗不奉命  
擅破回紇不聽子昂上疏曰國家能制十姓者繇九姓  
彊大臣伏中國故勢微弱委命下吏今九姓叛亡北蕃  
喪亂君長無主回紇殘破磧北諸姓已非國有欲犄角  
亡叛唯金山諸蕃共為形勢有司乃以揚名擅破回紇  
歸十姓之罪拒而遣還不使入朝恐非羈戎之長策也



十姓內無國家親信之恩外有回紇報讐之患懷不自  
安烏駭狼顧則河西諸蕃自此拒命矣且彼自相攻中  
國之福今回紇已破既無可言十姓非罪又不當絕罪  
止揚名足以慰其首領矣近詔同城權置安北府其地  
當磧南口制匈奴之衝常為劇鎮臣頃聞磧北突厥之  
歸者已千餘帳來者未止甘州降戶四千帳亦置同城  
今磧北喪亂荒饑之餘無所存仰陛下開府招納誠覆  
全戎狄之仁也然同城本無儲峙而降附蕃落不免寒

飢更相劫掠今安北有官牛羊六千粟麥萬斛城孤兵少降者日衆不加救卹盜劫日多夫人情以求生為急今有粟麥牛羊為之餌而不救其死安得不為盜乎盜興則安北不全甘涼以往躋以待陷後為邊患禍未可量且徵外代有雄傑與中國抗有如勃起招合遺散衆將係興此國家大機不可失也又謂河西諸州軍興以來公私儲蓄尤可嗟痛涼州歲食六萬斛屯田所收不能償墾陛下欲制河西定亂戎此州空虛未可動也甘

州所積四十萬斛觀其山川誠河西喉咽地北當九姓  
南逼吐蕃姦回不測伺我邊罅故甘州地廣粟多左右  
受敵但戶止三千勝兵者少屯田廣夷倉庾豐衍瓜肅  
以西皆仰其餽一旬不往士已枵飢是河西之命係于  
甘州矣且其四十餘屯水泉良沃不待天時歲取二十  
萬斛但人力寡乏未盡墾發異時吐蕃不敢東侵者繇  
甘涼士馬彊盛以抗其入今甘州積粟萬計兵少不足  
以制賊致吐蕃敢大入燔蓄穀蹂諸屯則河西諸州我

何以守宜益屯兵外得以防盜內得以營農取數年之  
收可飽士百萬則天兵所臨何求不得哉其後吐蕃果  
入寇終后世為邊患最甚后方謀開蜀山由雅州道翦  
生羌因以襲吐蕃子昂上書以七驗諫止之曰臣聞亂  
生必由於怨雅州邊羌自國初以來未嘗一日為盜今  
無罪蒙戮怨必甚怨甚則蜂屯蟻聚相煽以變而邊邑  
連兵守備不解蜀之禍構矣東漢喪敗亂始諸羌一驗  
也吐蕃黠獫狁抗天誅者二十餘年前日薛仁貴郭待封

以十萬衆敗大非川一甲不返李敬玄劉審禮舉十八萬衆困青海身執賊廷闕隴為空今迺欲建李處一為上將驅疲兵襲不可幸之吐蕃舉為賊笑二驗也夫事有求利而得害者昔蜀與中國不通秦以金牛美女啖蜀侯侯使五丁力士棧褒斜鑿通谷迎秦之饋秦隨以兵而地入中州三驗也吐蕃愛蜀富思盜之矣徒以障隧隘絕頓餓喙不得噬今撤山羌開阪險使賊得收奔亡以攻邊是除道待賊舉蜀以遺之四驗也蜀為西南

一都會國之寶府又人富粟多浮江而下可濟中國今  
圖僥倖之利以事西羌得羌地不足耕得羌財不足富  
是過殺無辜之衆以傷陛下之仁五驗也蜀所恃有險  
也蜀所安無役也今開蜀險役蜀人險開則便寇人役  
則傷財臣恐未及見羌而姦盜在其中矣異時益州長  
史李崇真託言吐蕃寇松州天子為盛軍師趣轉餉以  
備之不三年巴蜀大困不見一賊而崇真姦賊已鉅萬  
今得非有姦臣圖利復以生羌為資六驗也蜀士阡孱

不知兵一羌持矛百人不敵當若西戎不即破滅臣見蜀之邊垂且不守而為羌人所暴七驗也國家近廢安北拔單于棄龜茲放疏勒天下翕然以為務仁不務廣務養不務殺今徇貪夫之議誅無罪之羌遺全蜀患此臣所未諭方今山東飢闕隴弊生人流亡誠陛下寧靜思和天人之時安可動甲兵興大役以自生亂又西軍失守北屯不利邊人駭情今復舉興師投不測小人徒知議興役之利非帝王至德也后復召見使論為政之

要適時不便者子昂乃奏八科一措刑二官人三知賢  
四去疑五招諫六勸賞七息兵八安宗子俄遷右衛胄  
曹參軍后既稱皇帝改號周子昂上周受命頌母喪去  
官服終擢右拾遺子昂多病居職不樂會武攸宜討契  
丹表子昂參謀次漁陽前軍敗舉軍震恐攸宜輕易無  
將略子昂諫曰陛下發天下兵以屬大王安危成敗在  
此舉安可忽哉今大王法制不立有如兒戲願審智愚  
量勇怯度衆寡以長攻短此刷恥之道也能聽愚計分



麾下萬人為前驅契丹小醜指日可禽攸宜以其儒者  
謝不納居數日復進計攸宜怒徙署軍曹子昂知不合  
不復言聖厯初以父老表解官歸侍詔以官供養會父  
喪廬冢次每哀慟聞者為涕縣令段簡貪暴聞其富欲  
害之家人納錢二十萬緡簡薄其賂捕送獄中憂憤死  
年四十三子昂資褊躁然輕財好施篤朋友與陸餘慶  
王無競房融崔泰之盧藏用趙元最厚唐興文章承徐  
庾餘風子昂始變雅正初為感遇詩三十八章王適曰

是必為海內文宗乃請交子昂所論著當世以為法子  
光與趙元子少微俱以文稱光終商州刺史子易甫簡  
甫皆位御史

王無競者字仲列世居東萊宋太尉弘之遠裔家足于  
財頗負氣豪縱擢下筆成章科調樂城尉三遷監察御  
史改殿中會朝宰相宗楚客楊再思離立偶語無競楊  
笏曰朝禮尚敬公等大臣不宜慢常典楚客怒徙無競  
太子舍人神龍初詆權幸出為蘇州司馬張易之等誅

坐常交往貶廣州仇家矯制榜殺之

趙元者字貞固河間人祖揆號通儒在隋與同郡劉焯  
俱召至京師補黎陽長徙居汲元少負志略好論辨來  
游雒陽士爭慕嚮所與造謝皆縉紳選調宜祿尉到職  
非公事不言彈琴蒔藥如隱者之操卒年四十九其友  
魏元忠孟詵宋之問崔璩等共諡昭夷先生

欽定續通志卷二百十五

欽定四庫全書

欽定續通志卷二百十六

列傳

唐

十六

劉仁軌

裴行儉

光庭均

稹

婁師德

劉仁軌字正則汴州尉氏人少貧賤好學值亂不能安業每動止畫地書空寓所習卒以通博聞武德初河南道安撫大使任瓌上疏有所論奏仁軌見其藁為竄定

數言環驚異赤牒補息州參軍轉陳倉尉部人折衝都尉魯寧者豪縱犯法縣莫敢屈仁軌約不再犯而寧暴橫自如仁軌榜殺之州以聞太宗曰尉而殺吾折衝可乎召詰讓仁軌對曰寧辱臣臣故殺之帝以為剛正更擢咸陽丞貞觀十四年校獵同州時秋斂未訖仁軌諫曰今茲澍澤霑足百穀熾茂收纔十二常日贅調已有所妨又供獵事繕橋治道役雖簡省猶不損數萬少延一旬使場圃畢勞陛下六飛徐驅公私交泰璽書褒納

拜新安令累遷給事中為李義府所忌出為青州刺史

顯慶五年伐百濟義府欲斥以罪使督漕而船果覆沒

坐免官白衣隨軍

按舊書載仁軌監統水軍征遼以後期坐免新書及張鷟朝野僉載皆云

督運覆船今從之

又通鑑考異云仁軌從軍乃在百濟非征遼也新舊書並誤今改從通鑑

初蘇定

方既平百濟留郎將劉仁願守其城左衛中郎將王文

度為熊津都督撫納殘黨文度死百濟故將福信及浮

屠道琛迎故王子扶餘豐立之引兵圍仁願詔仁軌檢

校帶方州刺史統文度之衆并發新羅兵為援仁軌將

兵嚴整轉關陷陣所向無前信等釋仁願圍退保任存  
城旣而福信殺道琛并其衆招還叛亡勢張甚仁軌與  
仁願合則解甲休士時定方伐高麗圍平壤不克高宗  
詔仁軌拔軍就新羅與金法敏議去留計將士咸欲還  
仁軌曰春秋之義大夫出疆有可以安社稷便國家者  
得專之今天子欲滅高麗先誅百濟留兵鎮守制其心  
腹宜厲兵秣馬乘無備擊不意百下百全戰勝之日開  
張形勢騰檄濟師聲援接虜亡矣今平壤不勝熊津又

拔則百濟之燼復炎高麗之滅無期吾等雖入新羅正似坐客有不如志悔可得邪扶餘豐猜貳表合內攜勢不支久宜堅守伺變以圖之不可輕動衆從其議乃請益兵時賊守真峴城仁軌夜督新羅兵薄城扳堞比明入之遂通新羅饗道而豐果襲殺福信遣使至高麗倭丐援會詔遣右威衛將軍孫仁師率軍浮海而至士氣振於是諸將議所向或曰加林城水陸之衝盍先擊之仁軌曰兵法避實擊虛加林險而固攻則傷士守則曠



日周留城賊巢穴羣凶聚焉若克之諸城自下於是仁師仁願及法敏帥陸軍以進仁軌與杜爽扶餘隆繇熊津白江會之遇倭人白江口四戰皆克焚四百艘海水為丹扶餘豐脫身走偽王子扶餘忠勝忠志等率其衆與倭人降獨酋卽遲受信據任存城未下始定方破百濟酋領沙吒相如黑齒常之嘯亡散據險以應福信至是皆降仁軌以赤心示之俾取任存自効卽給鎧仗糧糒仁師曰夷狄野心難信若授甲濟粟資寇便也仁軌

曰吾觀相如常之忠勇有謀因機立功尚何疑二人訖拔其城遲受信委妻子奔高麗百濟餘黨悉平仁師等振旅還詔留仁軌統兵鎮守百濟再被亂殭屍如莽仁軌始命瘞埋弔祭焉葺復戶版署官吏開道路營聚落復防堰賑貧貸乏勸課耕種為立官社民皆安其所遂營屯田以經畧高麗仁願至京師帝勞曰若本武將軍中奏請皆有文理何道而然對曰仁軌之辭非臣所能帝歎賞之超進仁軌六階真拜帶方州刺史賜第一區

厚賚妻子璽書褒勉先是貞觀永徽中士戰歿者皆詔使弔祭或以贈官推授子弟顯慶後討伐恩賞殆絕及破百濟平壤有功者皆不甄叙州縣購募不願行身壯家富者以財參逐率得避免所募皆傭劣寒儻無鬪志仁軌具論其弊請加慰賚以鼓士心又表用扶餘隆使綏定餘衆帝乃以隆為熊津都督時劉仁願為卑列道總管詔率兵度海使代舊屯與仁軌俱還仁軌曰國家懸軍海外欲以經畧高麗方農時而吏與兵悉被代新

至者未習萬一邊地生變誰與捍之不如留舊兵令收  
獲辦具資糧節級遣還仁軌當留未可去仁願不可曰  
吾但知準詔耳仁軌曰不然苟利國家知無不為臣之  
節也因陳便宜願留屯詔可由是以仁願為不忠始仁  
軌任帶方州謂人曰天將富貴此翁邪乃請所頒歷及  
宗廟諱或問其故答曰當削平遼海頒示本朝正朔卒  
皆如言及封太山仁軌乃率新羅百濟儋羅倭四國酋  
長赴會天子大悅擢為大司憲遷右相兼檢校太子左

中護累功封樂城縣男總章元年為熊津道安撫大使  
兼涓江道總管副李勣討高麗平之以疾辭位進金紫  
光祿大夫聽致仕俄召為隴州刺史拜太子左庶子同  
中書門下三品監修國史咸亨五年為雞林道大總管  
東伐新羅仁軌率兵絕瓠蘆河攻大鎮七重城破之進  
爵為公子及兄子授上柱國者三人州黨榮之號所居  
為樂城鄉三柱里俄拜尚書左僕射兼太子賓客仍知  
政事吐蕃入寇命為洮河道行軍鎮守大使永隆三年

加太子少傅數乞骸骨聽解左僕射帝幸東都太子監國詔仁軌與裴炎薛元超留輔及太子赴東都又詔太孫重照留守仁軌副之武后臨朝復拜左僕射太孫廢仁軌專知留守事上疏辭疾因陳吕后祿產禍敗事以規后后遣武承嗣齎璽書勉慰改文昌左相同鳳閣鸞臺三品卒年八十五詔百官赴哭冊贈開府儀同三司并州大都督陪葬乾陵賜其家實封三百戶仁軌雖貴顯不自矜倨接舊故如布衣時嘗為御史袁異式所劾

慢辱之脅使引決及拜大司憲異式尚在臺不自安因醉以情自解仁軌持觴曰所不與公者有如此觴後既執政薦為司元大夫然官由州縣至宰輔善致聲譽得吏下歡心及鎮洮河奏請機急多為李敬玄抑卻仁軌乃表敬玄為帥以代已果覆其衆裴炎下獄仁軌方留守京師郎將姜嗣宗以使來因語炎事且曰炎異於常久矣仁軌曰使人知邪曰知及還表嗣宗知炎反狀不告武后怒拉殺之子濬官太子舍人垂拱中為酷吏所

殺中宗即位以仁軌有東宮舊再贈司空濬子晃開元  
中為給事中表請立碑追諡曰文獻

裴行儉字守約絳州聞喜人父仁基隋光祿大夫自王  
世充所謀歸國被害贈原州都督諡曰忠行儉幼引蔭  
補弘文生貞觀中舉明經調左屯衛倉曹參軍時蘇定  
方為大將軍謂曰吾用兵世無可教者子其人乎乃盡  
畀以術遷長安令高宗將立武昭儀行儉以為國家憂  
從此始與長孫无忌褚遂良祕議大理袁公瑜摘語昭



儀母左除西州都督府長史麟德二年擢累安西都護西域諸國多慕義歸附召為司文少卿遷吏部侍郎與李敬玄馬載同典選有能名時號裴馬

舊書云時稱裴李

行儉

始設長名榜銓注等法又定州縣升降資擬高下為故事上元三年吐蕃叛出為洮州道左二軍總管改秦州右軍並受周王節度儀鳳二年十姓可汗阿史那都支及李遮旬誘蕃落以動安西與吐蕃連和朝廷欲討之行儉議曰吐蕃叛渙方熾敬玄失律審禮喪元安可更

為西方生事今波斯王死其子泥涅師質京師有如遣  
使立之即路出二蕃若權以制事可不勞而功也帝因  
詔行儉冊送波斯王且為安撫大食使徑莫賀延磧風  
磧畫冥導者迷將士饑乏行儉止營致祭令曰水泉非  
遠衆少安俄而雲徹風恬行數百步水草豐美後來者  
莫識其處衆皆驚以方漢貳師將軍至西州諸蕃郊迎  
行儉召豪傑千餘人自隨揚言大熱未可以進宜駐軍  
須秋都支覘知之不設備行儉徐召四鎮酋長偽約敗

謂曰吾念此樂未始忘孰能從吾獵者於是子弟願從者萬人乃陰勒部伍數日倍道而進去都支帳十餘里先遣其所親問安否外若閒暇非討襲者又使人趣召都支都支本與遮箇計及秋拒使者已而聞軍至倉卒不知所出率子弟五百餘人詣營謁遂禽之是日傳契箭召諸部酋長悉來請命並執送碎葉城簡精騎約齎襲遮箇道獲遮箇使者釋之俾前往諭其主并言都支已禽狀遮箇乃降悉俘至京師將吏為刻石碎葉城以

紀功帝遣勞宴曰行儉提孤軍深入萬里兵不血刃而  
叛黨禽夷可謂文武兼備矣其兼授二職即拜禮部尚  
書兼檢校右衛大將軍調露元年突厥向史德溫傳反  
單于管二十四州叛應之衆數十萬都護蕭嗣業討賊  
不克死敗係踵詔行儉為定襄道行軍大總管討之率  
太僕少卿李思文營州都督周道務部兵十八萬合西  
軍程務挺東軍李文暕等總三十餘萬旗幟亘千里行  
儉咸節制之先是嗣業饋糧數為虜鈔軍餒死行儉曰

以謀制敵可也因詐為糧車三百乘車伏壯士五輩齎  
陌刀勁弩以羸兵挽進又伏精兵踵其後虜果掠車羸  
兵走險賊驅就水草解鞍牧馬方取糧車中而壯士突  
出伏兵至殺獲幾盡自是糧車無敢近者大軍次單于  
北暮已立營塹壕既周行儉更命徙營高岡吏白士安  
堵不可擾不聽促徙之比夜風雨暴至前占營所水深  
丈餘衆莫不駭嘆問何以知之行儉曰自今第如我節  
制毋問我所以知也

謹按通鑑輯覽

御批行儉於當時固為諸將巨擘然三百乘乘各五壯士當為一千五百人虜以為糧車驅去當必紛紛散行前後不齊且此驅行之際虜豈不覺必待取糧而後千五百人者齊自車中躍出奮擊是誰為之期會記載者欲奇其事而不自覺其必無是理致人疑笑矣又下營當避溪壑水潦必至之處行圍亦然有何奇特而致諸將之驚服行儉且自以為神賊拒黑山數戰皆敗行儉縱兵前後殺虜不勝益足鄙耳

計偽可汗泥熟匐為其下所殺持首來降又禽大首領奉職而還餘黨走狼山行儉既還阿思那伏念偽稱可汗復與溫傳合明年行儉還總諸軍頓代州之陘口縱反間說伏念令與溫傳相貳伏念懼密送款且請縛傳

自效行儉祕不布密以聞後數日煙塵漲天而南斥候  
惶駭行儉曰此伏念執溫傳來降非他也且受降如受  
敵乃敕嚴備遣單使往勞既而果然於是哭厥餘黨悉  
平帝悅遣戶部尚書崔知悌勞軍初行儉許伏念以不  
死侍中裴炎害其功建言伏念為程務挺張虔勗脅逐又  
磧北回紇逼之計窮而降卒斬伏念及溫傳於都市行  
儉之功不錄封聞喜縣公行儉歎曰渾濬之事古今恥  
之但恐殺降則後無復來矣遂稱疾不出永淳元年十

姓突厥車薄叛復為金牙道大總管未行卒年六十四  
贈幽州都督諡曰獻詔皇太子遣官護視家事子孫能  
自立乃停中宗即位再贈揚州大都督行儉工草隸名  
家帝嘗以絹素詔寫文選覽之祕愛其法賚物良厚行  
儉每曰褚遂良非精筆佳墨未嘗輒書不擇筆墨而妍  
捷者余與虞世南耳所譔選譜草字雜體數萬言又為  
營陣部伍料勝負別器能等四十六訣武后詔武承嗣  
就第取去不復傳行儉通陰陽歷術每戰豫道勝日善



知人在吏部時見蘇味道王勣謂曰二君後皆掌銓衡  
李敬玄盛稱王勃楊炯盧照鄰駱賓王之才引示行儉  
行儉曰士之致遠先器識後文藝如勃等雖有才而浮  
躁銜露豈享爵祿者哉炯頗沈嘿可至令長餘皆不得  
其死所引偏裨若程務挺張虔勗崔智譽王方翼党金  
毗劉敬同郭待封李多祚黑齒常之類為世名將儉奏  
至刺史將軍者數十人嘗賜馬及珍鞍令史私馳馬馬  
蹶鞍壞懼而逃行儉招還之不加罪初平都支遮箇獲

瓊寶不貲蕃酋將士願觀焉行儉因宴徧出示坐者有  
碼碯盤廣二尺文彩粲然軍士趨跌盤碎惶怖叩頭流  
血行儉笑曰爾非故也何至是色不少吝帝賜都支資  
產五金三千餘物橐駝馬牛稱是行儉分給親故洎麾  
下數日輒盡子光庭

光庭字連城早孤母庠狄氏有婦德武后召入宮為御  
正甚見親寵光庭由是累遷太常丞以武三思壻坐貶  
郢州司馬開元中擢兵部郎中鴻臚少卿性靜默寡交

游雖驟歷臺省人未之許既而以職業稱議者更推之  
玄宗有事岱宗張說以天子東巡京師空虛恐邊陲乘  
間竊發議欲加兵守邊召光庭與謀對曰封禪者所以  
告成功也夫成功者德無不被人無不安萬國無不懷  
今將告成而懼邊陲非昭德也大興力役用備不虞非  
安人也方謀會同而阻戎心非懷遠也此三者名實乖  
矣且諸蕃突厥為大贄幣往來願修和好有年矣若遣  
一使召其大臣使赴行在必欣然應命突厥受詔則諸

蕃君長必相率而來我偃旗息鼓不復事矣說曰善吾  
所不及因奏用其策突厥果遣使來朝東封還遷兵部  
侍郎久之拜中書侍郎同中書門下平章事兼御史大  
夫遷黃門侍郎拜侍中兼吏部尚書弘文館學士撰搖  
山往則維城前軌二篇獻之手制褒美詔皇太子諸王  
於光順門見光庭謝所以規諷之意光庭又引壽安丞李  
融拾遺張琪著作佐郎司馬利賓直弘文館撰續春秋  
經傳自戰國訖隋表請天子修經光庭等作傳書久不

就時有建言唐應為金德者中書令蕭嵩請百官普議  
光庭以唐符命表著天下久矣不可改亟奏罷之二十  
年封正平縣男初知星者言上相變不利大臣請禳之  
光庭曰使禍可禳而去則福可祝而來也論者以為知  
命卒年五十八贈太師初吏部求人不以資考為限所  
獎拔惟其才往往得俊又任之士亦自奮其後士人狠  
衆專務趨競銓品枉撓光庭懲之因行儉長名榜乃為  
循資格無賢不肖一據資考配擬又促選限盡正月任

門下省主事閻麟之專主過官凡麟之裁定光庭輒然  
可時語曰麟之口光庭手素與蕭嵩輕重不平及卒嵩  
奏一切罷之光庭所引盡斥外官博士孫琬以其用循  
資格非獎勸之誼謚曰克平舊書通鑑並無平字按謚法愛民在刑曰克執事有制曰平孫琬正取執事有制之義  
當有平字為是唐會要亦作克平時以為希嵩意帝聞  
特賜謚曰忠憲舊書通鑑會要並作忠獻詔張九齡文其碑

子稹以蔭仕累遷起居郎開元末壽王瑁以母寵欲立  
為太子稹陳申生戾園禍以諫玄宗改容謝之詔授給

事中禎曰陛下絕招諫之路為日滋久今臣一言而荷殊寵則言者將衆何以錫之帝善其讓止不拜俄授祠部員外郎卒子倩字容卿歷信州刺史勸民墾田二萬畝以治行賜金紫服代第五琦為度支郎中卒謚曰節子均

均字君齊以明經為諸暨尉數從使府辟以才顯張建封鎮濠壽表團練判官時李希烈以淮蔡叛建封扞賊均參贊之以勞加上柱國襲正平縣男累遷膳部郎中

擢荆南節度行軍司馬就拜荆南節度使劉闢叛先駭  
黔巫脅荆楚以固首尾均發精騎三千迎擊之賊望風  
奔却加檢校吏部尚書初均與崔太素俱事中人竇文  
場太素嘗晨省文場入卧內自謂待已至厚徐觀後榻  
有頻伸者乃均也德宗以均任方鎮欲遂相之諫官李  
約上疏斥均為文場養子不可汙台輔乃止元和三年  
入為尚書右僕射判度支俄檢校左僕射同中書門下  
平章事為山南東道節度使累封郇國公以財交權倖



任將相凡十餘年荒縱無法度卒年六十二贈司空

婁師德字宗仁鄭州原武人第進士調江都尉揚州長  
史盧承業異之曰子台輔器也當以子孫相諉詎論僚  
吏哉上元初為監察御史會吐蕃盜邊劉審禮戰歿師  
德奉使收敗亡於洮河因使吐蕃其首領論贊婆等自  
赤嶺操牛酒迎勞師德喻國威信開陳利害大為畏悅  
後募猛士討吐蕃乃自奮戴紅抹額來應詔高宗假朝  
散大夫使從軍有功遷殿中侍御史兼河源軍司馬并

知營田事與彼戰白水澗八遇八克天授初為左金吾將軍檢校豐州都督衣皮袴率士屯田積穀數百萬兵以饒給無轉饟和糴之費武后降書勞之長壽元年召授夏官侍郎判尚書事進同鳳閣鸞臺平章事后嘗謂師德師在邊必待營田公不可以劬勞憚也乃復以為河源積石懷遠軍及河蘭鄯廓州檢校營田大使入遷秋官尚書原武縣男改左肅政御史大夫並知政事證聖中與王孝傑拒吐蕃於洮州戰素羅汗山敗績貶原

州員外司馬萬歲通天二年入為鳳閣侍郎同鳳閣鸞  
臺平章事後與武懿宗狄仁傑分道撫定河北進納言  
更封譙縣子隴右諸軍大使復領營田聖歷三年突厥  
入寇詔檢校并州長史天平軍大總管九月卒于會州  
年七十贈幽州都督謚曰貞葬給往還儀仗師德長八  
尺方口博脣深沈有度量人有忤已輒遜以自免不見  
容色嘗與李昭德偕行師德素豐碩不能遽步昭德遲  
之恚曰為田舍子所留師德笑曰吾不田舍復在何人

其弟守代州辭之官教之耐事弟曰人有唾面潔之乃

已師德曰未也潔之是違其怒正使自乾耳

謹按通鑑輯覽

批高而不危滿而不溢處榮寵者自有正道笑而受唾豈以直報怨之義師德之言鄙極矣

在夏官注

選選者就按閱簿師德曰容我擇之可乎選者不去乃

灑筆曰墨汙爾狄仁傑未輔政師德薦之及同列數擠

令外使武后覺問仁傑曰師德賢乎對曰為將謹守賢

則不知也又問知人乎對曰臣嘗同僚未聞其知人也

后曰朕用卿師德薦也誠知人矣出其奏仁傑慙已而

歎曰婁公盛德我為所容乃知吾不逮遠矣總邊要為將相者三十年恭勤樸忠無適莫方酷吏殘鷙人多不免獨能以功名始終與郝處俊相亞世之言長者稱婁郝



欽定續通志卷二百十六

欽定四庫全書

史部

欽定續通志卷二百二十七至

通政司副使臣施朝幹履勘

總校官原任侍講臣王燕緒

欽定四庫全書

欽定續通志卷三十五

列傳

唐十七

史大奈

馮盎智藏

阿史那社尒忠

執失思力

契苾何力明

黑齒常之

李謹行

泉男生獻誠

李多祚李湛

論弓仁惟貞

尉遲勝

尚可孤

裴玢

史大奈本西突厥特勒也與處羅可汗入隋事煬帝從  
伐遼積勞為金紫光祿大夫後分其部於樓煩高祖興  
太原大奈提其眾隸麾下桑顯和戰飲馬泉諸軍却大  
奈以勁騎數百背擊顯和破之軍遂振授光祿大夫從  
平長安功多賞帛五千匹賜姓史從秦王平薛舉王世  
充竇建德劉黑闥功殊等積前後賜侍女三雜綵萬段  
貞觀初擢累右武衛大將軍檢校豐州都督封實國公



食封戶三百卒贈輔國大將軍

馮盎字明達高州良德人本北燕馮弘裔孫弘不能以國下魏亡奔高麗遣子業以三百人浮海歸晉弘已滅業留番禺至孫融事梁為羅州刺史子竇聘越大姓洗氏女為妻遂為首領授本郡太守至盎三世矣隋仁壽初盎為宋康令潮成等五州獠叛盎馳至京師請討之文帝詔左僕射楊素與論賊形勢素奇之曰不意蠻夷中乃生是人即詔盎發江嶺兵擊賊平之拜漢陽太守

從煬帝伐遼東遷左武衛大將軍隋亡奔還嶺表嘯署  
酋領有衆五萬番禺新興名賊高法澄洗寶徹等受林  
士弘節度殺官吏益率兵破之寶徹兄子曰智臣復聚  
兵拒戰益進討兵始合輒釋胄大呼曰若等識我耶衆  
委戈袒而拜賊遂潰禽寶徹智臣等遂有番禺蒼梧朱  
崖地自號總管或說益曰隋季崩蕩海內震駭唐雖應  
運而風教未孚嶺越無係屬公克平二十州地數千里  
名位未正請上南越王號益曰吾居越五世矣牧伯惟

我一姓子女玉帛我有也人生富貴如我希矣常恐忝

先業尚自王哉武德五年

按通鑑亦作五年舊書作四年

始以地降高

祖析為高羅春白崖儋林振八州授盎上柱國高州總

管封越國公

舊書作封吳

拜其子智戴為春州刺史智或為

東合州刺史盎徙封耿貞觀初盎與酋長談殿等迭相

攻擊久未入朝諸州奏稱盎反前後以十數太宗召右

武衛將軍蘭暮發江淮卒將討之魏徵諫曰天下初定

嶺南瘴癘險遠不可以宿大兵且盎反狀未成未宜動

衆帝曰告者道路不絕何云反狀未成對曰盜若反必分兵據險攻掠州縣今告者已數年而兵不出境此不反明矣彼為諸州所告懼死故不敢入朝若遣信臣示

以至誠彼喜於免禍必自歸

按此事舊書不載新書所記亦不如通鑑之詳盡且

新書云人告盜反盜舉兵拒境故太宗出師以魏徵之言考之亦不合通鑑據太宗實錄及魏文貞公故事當得其實今用帝乃遣散騎常侍韋叔諧

通鑑作散騎侍郎李公掩諭

盜盜遣智戴入侍帝曰徵一言賢於十萬衆時募兵已出欲遂有功遣副將上盜可擊狀帝不許罷之五年盜

來朝宴賜甚厚俄而羅賓諸洞獠叛詔盎率衆二萬為  
諸軍先鋒賊據險不可攻盎持弩語左右曰矢盡勝負  
可知矣發七矢斃七人賊退走盎縱兵乘之斬首千餘  
級帝詔智戴還慰省賞予不可計奴婢至萬人盎善為  
治閑簿最撻姦伏得民懼心卒贈左驍衛大將軍荊州  
都督子三十人

智戴勇而有謀能撫衆得士死力酋帥皆樂屬之嘗隨  
父至洛陽統本部銳兵宿衛煬帝遇弑引其下逃歸時

盜賊多嶺嶠路絕智戴轉戰而前至高源俚帥脅為謀  
主會益至智戴得與益俱去後入朝帝勞賜加等授衛  
尉少卿聞其善兵指雲問曰下有賊今可擊乎對曰雲  
狀如樹方辰在金金利木柔擊之勝帝奇其對累遷左武  
衛將軍卒贈洪州都督

阿史那社尒突厥處羅可汗之次子年十一以智勇聞  
拜拓設建牙磧北與頡利子欲谷設分統鐵勒回紇僕  
骨同羅諸部處羅卒哀毀如禮治衆十年無課歛或勸

厚賦以自奉答曰部落豐餘於我足矣故首領咸愛之  
頡利數用兵社尒諫弗納貞觀元年鐵勒回紇薛延陀  
等叛敗欲谷設於馬獵山社尒助擊之弗勝明年將餘  
衆西保可汗浮圖城會頡利滅西突厥統葉護又死奚  
利必咄陸可汗與泥孰爭國社尒引兵襲之得其半國  
有衆十餘萬乃自號都布可汗謂諸部曰始為亂破吾  
國者延陀也今我據西方而不平延陀是忘先可汗非  
孝也事脫不勝死無恨酋長昏曰我新得西方須留撫

定今置棄之遠擊延陀延陀未禽葉護子孫將復吾國  
社亦不從選騎五萬討延陀磧北連兵十旬士苦其久  
稍潰去延陀縱擊大敗之乃走保高昌衆纔萬人又與  
西突厥不平由是率衆內屬十年入朝

舊書作九年

授左驍

衛大將軍處其部於靈州詔尚衡陽長公主為駙馬都  
尉典衛屯兵十四年以交河道行軍總管平高昌諸將  
咸受賞社亦以未奉詔秋毫不敢取見別詔然後受又  
所取皆老弱陳樊太宗美其廉賜高昌寶鈿刀雜綵千



段詔檢校北門左屯營封畢國公從征遼東中流矢堰  
去復戰所部奮厲皆有功還擢兼鴻臚卿二十一年以  
崑丘道行軍大總管與契苾何力郭孝恪楊弘禮李海  
岸等五將軍發鐵勒十三部及突厥騎十萬討龜茲師  
次西突厥擊處密處真敗之處真通鑑作處月入自焉耆西兵  
出不意龜茲震恐進屯磧石伊州刺史韓威以千騎先  
進右騎衛將軍曹繼叔次之至多褐城其王率衆五萬  
拒戰威陽卻王悉兵逐北威與繼叔合殊死戰大破之

社尒因拔都城王輕騎遁社尒留孝恪守自率精騎追躡行六百里王據大撥換城嬰險自固社尒攻凡四十日入之禽其王并下五大城遣左衛郎將權祗甫徇諸酋長示禍福降者七十餘城宣諭威信莫不歡服刻石紀功而還因說于闐王入朝王獻馬畜三百餉軍西突厥焉耆安國皆爭犒師孝恪之在軍牀帷器用多飾金玉以遺社尒社尒不受帝聞曰二將優劣不復問人矣帝崩請以身殉衛陵寢高宗不許遷右衛大將軍永徽

六年卒贈輔國大將軍并州都督陪葬昭陵治冢象蔥  
山謚曰元子道真歷左屯衛大將軍咸亨初為邏娑道  
副大總管與薛仁貴討吐蕃以援吐谷渾為論欽陵所  
敗盡失其兵詔有司問狀免死為民

阿史那忠者字義節蘇尼失子也資清謹以功擢左屯  
衛將軍尚宗室女定襄縣主始詔姓獨著史居父喪哀  
慕過人會立阿史那思摩為突厥可汗以忠為左賢王  
及出塞不樂見使者必泣請入侍許焉封薛國公擢右

驍衛大將軍宿衛四十八年無纖隙人比之金日磾卒  
贈鎮軍大將軍謚曰貞陪葬昭陵

執失思力突厥酋長也貞觀中護送隋蕭后入朝授左  
領軍將軍會頡利敗太宗令思力諭降渾斛薩部落稍  
親近帝遂免苑中思力諫曰陛下為四海父母乃自輕  
臣竊殆之帝異其言後復逐鹿思力脫巾帶固諫帝為  
止及討遼東詔思力屯金山道領突厥扞薛延陀延陀  
兵十萬寇河南思力示羸不與确賊深入至夏州乃整

陣擊敗之追躡六百里會毗伽可汗死糴兵磧北而歸  
復徙江夏王道宗破延陀餘衆與平吐谷渾詔尚九江  
公主拜駙馬都尉封安國公坐交房遣愛高宗以其戰  
多敵不誅流嵩州主請削封邑偕往主前卒龍朔中以  
思力為歸州刺史卒麟德元年復公主封邑贈思力勝  
州都督謚曰景

契苾何力鐵勒哥論易勿施莫賀可汗之孫父葛隋末  
為莫賀咄特勒以地近吐谷渾隘多厲暘徙去熱海

上何力九歲而孤號大侯利發貞觀六年與母率衆千餘詣沙州內屬太宗處其部於甘涼二州擢何力左領

軍將軍九年

舊書作七年

與李大亮薛萬徹萬均討吐谷渾

於敕水川萬均率騎先進為賊所包兄弟皆中創墮馬步關士死十七八何力馳壯騎冒圍奮擊虜披靡去是時吐谷渾王伏允在突淪川何力欲襲之萬均慙前敗以為不可何力曰賊無城郭逐薦草美水以為生不乘其不虞正恐鳥驚魚駭後無以窺其巢穴乃閱精騎千

餘直擣其牙斬首數千級獲橐駝馬牛羊二十餘萬俘其妻子伏乞挺身免有詔勞軍於大斗拔谷萬均取名出其下乃排何力引功自名何力不勝憤挺刀起將殺之諸將勸止及還帝責問其故何力具言萬均敗狀帝怒將解其官授何力何力頓首曰以臣而解萬均官恐四夷聞者謂陛下重夷輕華則誣告益多又夷狄無知謂漢將皆然非示遠之義帝重其言乃止有詔宿衛北門檢校屯營事尚臨洮縣主十四年為葱山道副大總管

與討高昌平之始何力母姑臧夫人與弟沙門在涼州沙門為賀蘭都督十六年詔何力往視母於是薛延陀毗伽可汗方強契苾諸酋爭附之乃脅其母弟使從何力驚謂其下曰上於爾有大恩且遇我厚何遽反皆曰可敦都督去矣尚何顧何力曰弟往侍足矣我義許國不可行衆執之至毗伽牙下何力箕踞拔佩刀東向呼曰有唐烈士受辱賊廷邪天地日月臨鑒吾志即割左耳誓不屈毗伽怒欲殺之其妻諫而止何力之被執也或



譏之帝曰何力入延陀如涸魚得水其脫必遽帝曰不然若人心如鐵石殆不背我會使至言狀帝泣下即詔兵部侍郎崔敦禮持節許延陀尚主因求何力乃得還授右驍衛大將軍公主行有日何力陳不可帝曰天子無戲言既許之臣奈何何力曰禮有親迎宜詔毗伽身到京師或詣靈武彼畏我必不來則姻不成而憂憤不知所出下必攜貳不及一年交相疑沮毗伽素狼戾必死則二子爭國內叛外攜不戰而禽矣帝然之毗伽果

不敢迎鬱邑不得志恚而死少子拔酌殺其庶兄突利  
失自立國中亂如其策云帝征高麗詔何力為前軍總  
管次白崖城中賊稍創甚帝自為博樂城拔得刺何力  
者高突勃驕使自殺之辭曰彼為其主冒白刃以刺臣  
此義士也大馬猶報其養況於人乎卒捨之俄以崑丘  
道總管平龜茲帝崩欲以身殉高宗諭止永徽中西突  
厥阿史那賀魯以處月處密姑蘇歌邏祿卑失五姓叛  
寇延州陷金略蒲類詔何力為弓月道大總管率左武

衛大將軍梁建方統秦成岐雍及燕然都護回紇兵八萬討之處月酋朱邪孤注遂殺招慰使果毅都尉單道惠據牢山以守何力等分兵數道攀崑而上急攻之賊大潰孤注夜遁輕騎窮蹙行五百里孤注戰死虜渠帥六十俘斬萬餘牛馬雜畜七萬取處密時健侯斤合支賀等以歸還左驍衛大將軍封郕國公顯慶中為沮江軍行軍大總管與蘇定方及右驍衛大將軍劉伯英伐高麗不克龍朔初復拜遼東道行軍大總管率諸蕃三

十五軍進討帝欲自率師繼之次鴨綠水蓋蘇文遣泉男生以精兵數萬拒險衆莫敢濟會冰合何力引兵譟而濟賊驚遂潰追奔斬首三萬級餘衆降男生脫身走有詔班師時鐵勒九姓叛詔何力為安撫大使何力以輕騎五百馳入其部虜大驚何力諭曰朝家知而誅誤遂及翻動使我貫爾過得自新罪在凶渠取之則已九姓大喜共擒偽葉護及特勒等二百人以歸何力數其罪誅之餘衆遂安士卒道死者令所在收瘞蠲護其家未

幾益蘇文死男生為弟所逐使子詣闕請降乃拜何力  
為遼東道行軍大總管安撫大使經略之副李勣同趨  
高麗勣已拔新城留何力守時高麗兵十五萬屯遼水  
引靺鞨數萬衆據南蘇城何力奮擊破之斬首萬級乘  
勝進拔八城引兵還與勣會合攻辱夷大行二城克之  
進拔扶餘勣勒兵未進何力率兵五十萬先趨平壤勣  
繼進攻凡七月拔之虜其王以獻進鎮軍大將軍行左  
衛大將軍徙封涼總章儀鳳間吐蕃滅吐谷渾勢益張

入寇鄯廓河坊等州詔周王為洮州道相王為涼州道  
行軍元帥率何力等討之二王不行亦會何力卒贈輔

國大將軍并州大都督陪葬昭陵謚曰毅

舊書云  
謚烈

子明字若水襁褓授上柱國封漁陽縣公年十三遷奉  
輦大夫李敬玄征吐蕃明為栢海道經略使以戰多進  
左威衛大將軍襲封賜錦袍寶帶它物蕃夥擢嫡子三  
品官再遷雞田道大總管至烏德鞬山誘附二萬帳武  
后時明妻及母臨洮縣主皆賜姓武以左鷹揚衛大將

軍卒年四十六贈涼州刺史謚曰靖明性沈厚喜學長  
辯論子聳襲爵

黑齒常之百濟西部人長七尺餘驍毅有謀略為百濟  
達率兼風達郡將猶唐刺史云蘇定方平百濟常之以  
所部降而定方囚老王縱兵大掠常之懼與左右酋長  
十餘人遁去嘯合逋亡依任存山自固不旬日歸者三  
萬定方勒兵攻之不克常之遂復二百餘城龍朔中高  
宗遣使招諭乃詣劉仁軌降累遷左領軍員外將軍洋

州刺史儀鳳三年從李敬玄劉審禮擊吐蕃審禮敗敬  
玄欲引還阻泥溝兵不得出賊屯高壓官軍常之夜率  
敢死士五百人掩其營殺略數百人賊酋跋地設棄軍  
走敬玄由此得還帝歎其才擢左武衛將軍檢校左羽  
林軍賜金帛殊等進為河源軍副使調露中吐蕃使贊  
婆等入寇叱良非川李敬玄禦之敗常之引精騎三千  
夜襲其軍斬首二千級獲羊馬數萬贊婆等單騎去即  
拜河源道經略大使因建言河源當賊衝宜增兵鎮守



而運餼須廣乃斥地置烽七十所墾田五十頃歲收粟百餘萬斛由是食衍士精戍邇有備永隆二年贊婆營青海常之馳掩其屯破之悉燒糧廩獲羊馬甲首不貲詔書勞賜凡涖軍七年吐蕃懍畏不敢盜邊封燕國公垂拱中突厥復犯塞常之率兵追擊至兩井忽與賊遇賊騎三千方擐甲常之見其驚以二百騎突之賊皆棄甲去其暮賊大至常之潛使人伐木列炬營中若烽燧然會風起賊疑救至遂夜遁久之為燕然道大總管與

李多祚王九言等擊突厥骨咄祿元珍於黃花堆破之  
追奔四十里賊潰歸磧北會左監門衛中郎將曩寶璧  
欲窮追要功詔與常之共討寶璧獨進為虜所覆舉軍  
沒寶璧下吏誅常之坐無功會周興誣其與右鷹揚將  
軍趙懷節反捕繫詔獄投繯死常之御下有恩所乘馬  
為士所蓄或請罪之答曰何遽以私馬鞭官兵乎前後  
賞賜分麾下無留貲及死人皆哀其枉

李謹行靺鞨人父突地稽部酋長也隋末率其屬千餘

內附居營州授金紫光祿大夫遼西太守武德初奉朝  
貢以其部為燕州授總管劉黑闥叛突地稽身到定州  
工書秦王請節度以戰功封耆國公徙部居昌平高開  
道以突厥兵攻幽州突地稽邀擊敗之貞觀初進右衛  
將軍賜氏李卒謹行偉容貌勇蓋軍中累遷營州都督家  
童至數千以貨自雄夷人畏之為積石道經略大使論  
欽陵衆十萬寇遼中候邏不知謹行聞虜至即植旗伐  
鼓開門以伺欽陵疑有伏不敢進上元三年破吐蕃於

青海盟書勞勉封燕國公卒贈幽州都督陪塋乾陵  
泉男生字元德高麗蓋蘇文子也九歲以父任為先人  
遷中裏小兄猶唐謁者也又為中裏大兄知國政凡辭  
令皆男生主之進中裏位鎮大兄久之為莫離支兼三  
軍大將軍加莫大離支出按諸部而弟男建男產知國  
事或曰男生惡君等逼已將除之建產未之信又有謂  
男生將不納君男生遣謀往男建捕得即矯高藏命召  
男生懼不敢入男建殺其子獻忠男生走係國內城率

其衆與契丹靺鞨兵內附遣子獻誠訴諸朝高宗拜獻  
誠右武衛將軍賜乘輿馬瑞錦寶刀使還報詔契苾何  
力率兵援之男生乃免授平壤道行軍大總管兼持節  
安撫大使舉哥勿南蘇倉巖等城以降帝又命西臺舍  
人李虔繹就軍慰勞賜袍帶金釵七事明年召入朝詔  
所過州縣傳舍作鼓吹右羽林將軍李同以飛騎仗延  
寵遷遼東大都督玄菟郡公賜第京師因詔還軍與李  
勣攻平壤使浮屠信城舊書高麗傳作新誠為內間引高麗銳兵

潛入禽高藏詔遣子齋手制金皿即遼水勞賜還進右衛大將軍卞國公賜寶麗宮侍女二馬八十儀鳳二年詔安撫遼東并置州縣招流冗平斂賦罷力役民悅其寬卒年四十六帝為舉哀贈并州大都督喪至都詔五品以上官哭之謚曰襄勒碑著功男生純厚有禮奏對敏辯善射藝其初至伏斧鑕待罪帝宥之世以此稱焉獻誠天授中以右衛大將軍兼羽林衛武后嘗出金幣命宰相南北牙羣臣舉善射五輩中者以賜內史張光

輔舉獻誠獻誠讓右玉鈐衛大將軍薛吐摩支摩支固  
辭獻誠曰陛下擇善射者然皆非華人臣恐唐官以射  
為耻不如罷之后嘉納來俊臣嘗求貨獻誠不答乃誣  
其謀反縊殺之后後知其寃贈右羽林衛大將軍以禮  
改葬

李多祚其先靺鞨酋長號黃頭都督後入中國世系湮  
遠至多祚驍勇善射以軍功累遷右鷹揚大將軍討黑  
水靺鞨誘其渠長置酒高會因醉斬之擊破其衆室韋

及孫萬榮之叛多祚與諸將進討以勞改右羽林大將軍遂領北門衛兵張柬之將誅二張以多祚素感慨可動以義乃從容謂曰將軍居北門幾何曰三十年矣將軍擊鐘鼎食貴重當世非大帝恩乎多祚泣數行下曰死且不忘東之曰將軍知感恩則知所以報今在東宮乃大帝子而嬖豎擅朝危逼宗社國家廢興在將軍將軍誠有意乎捨今日尚何及答曰苟利王室惟公所使乃引天地以自誓辭氣毅然東之遂定謀以敬暉李湛



為右羽林將軍命總禁兵與多祚王同皎請太子至玄

武門斬關入及長生殿

按桓彥範傳云時后處迎仙宮之集仙殿二處不同未知孰是

白武后曰諸將誅逆臣易之昌宗恐漏大謀不敢豫奏  
頓首請歸死后病卧顧湛曰我於而父子不薄亦豫是  
邪中宗復位封多祚遼陽郡王食實戶八百子承訓為  
衛尉少卿湛遷大將軍封趙國公食實戶五百帝祀太  
廟特詔多祚與相王登興夾侍監察御史王覲謂多祚  
夷人雖有功不宜共輦帝曰朕推以心腹卿無復言

崔玄暉等得罪多祚畏禍及故陽厚韋氏節愍太子誅  
武三思多祚與成王千里率兵先至玄武樓下具言所  
以誅三思狀按兵不戰宮衛令楊思勗方侍帝即挺刀  
斬其壻羽林中郎將野呼利兵因沮潰多祚為其下所  
殺二子亦見害籍沒其家景雲初追復官爵并宥家屬  
李湛者義府最幼子字興宗沈厚有度六歲授周王府  
文學累遷右散騎常侍襲河間郡公武后徙上陽宮留  
湛宿衛頃之復為右散騎常侍賜鐵券三思惡之貶果

州刺史歷洛絳二州累遷右領軍大將軍開元十年卒  
贈幽州都督初義府以立武后故得宰相而湛為中興  
功臣世不以其父惡為貶云

論弓仁本吐蕃族也父欽陵世相其國聖歷二年弓仁  
以所統吐蕃七千帳自歸投左玉鈐衛將軍封酒泉郡  
公神龍三年為朔方軍前鋒游奕使時張仁愿築三受  
降城弓仁以兵出諾真水草心山為邏衛開元初突厥  
九姓亂弓仁引軍渡漠踰白檉林收火拔部喻多真種

落降之跌跌思太叛戰赤柳澗弓仁騎才五百自新堡  
進時賊四環之衆不敵弓仁椎牛誓士自若再宿潰圍  
出人服其壯凡閱大小戰數百未嘗負賜寶玉甲第良  
田等同列莫與比累遷左驍衛大將軍朔方副大使會病  
玄宗遣上醫馳視卒年六十六歲贈撥川郡王謚曰忠  
孫惟貞

惟貞名瑀以字行志向恢大開元末為左武衛將軍肅  
宗在靈武以衛尉少卿募兵綏銀闕旬衆數萬從還鳳

翔遷光祿卿為元帥前鋒討擊使戰陝州以功進殿中  
監史思明攻李光弼於河陽周摯以兵二十萬陣城下  
惟貞請銳卒數千鑿數門出自旦及午苦戰破之光弼  
表為開府儀同三司光弼討史朝義以惟貞守徐州賊  
將謝欽讓據陳乃假惟貞潁州刺史斬賊將降者萬人  
封蕭國公實封百戶光弼病表以自代擢左領軍衛大  
將軍為英武軍使卒

尉遲勝本王于闐國天寶中入朝獻名玉良馬玄宗以

宗室女妻之授右威衛將軍毗沙府都督歸國與安西  
節度使高仙芝擊破薩毗播仙累進光祿卿安祿山反  
勝使弟曜攝國事身率兵五千赴難國人固留勝勝以  
少女為質而行肅宗嘉之拜特進兼殿中監廣德中進  
驃騎大將軍遣還固請留宿衛加開府儀同三司封武  
都郡王實封百戶勝請授國於曜詔可勝既留乃穿築  
池觀厚賓客士大夫多從之游從德宗至興元為右領  
軍將軍歷睦王傅貞元初曜上言國中以嫡承嗣今勝

讓國請立其子銳帝欲遣銳襲王勝固辭以曜久行國  
事人安之銳生京華不習其俗不可遣當是時兄弟讓  
國人莫不賢之睦府除徙原王傳卒贈涼州都督

尚可孤字可孤東部鮮卑宇文之別種世處松漠間天  
寶末隸范陽節度使安祿山復事史思明上元中自賊  
所歸累授左右威衛大將軍封白水縣伯為神策天將  
軍以功試太常卿徙封馮翊郡王食實戶一百五十魚  
朝恩主衛兵罷其勇養為子名智德使將兵三千屯扶

風武功歷十餘年隊伍閑整朝恩死詔賜氏李名嘉勲  
李希烈叛擢為招討應援荆襄使復本姓名累戰有功  
朱泚之難召可孤可孤率兵三千道襄鄧而西屬賊兵  
銳乃壁七盤偽將仇敬忠等來寇可孤擊卻之遂收藍  
田德宗將遷梁州命引兵守瀘上拜神策京畿渭南商  
州節度招討使敬忠拒戰可孤急擊斬之進軍與李晟  
收長安為先鋒以功加檢校尚書右僕射封馮翊郡王  
食實戶二百又會諸軍進討李懷光次沙苑卒於軍贈



司空

舊書作司徒

可孤性謹沈壯既有勲勞未嘗自論功御

衆公嚴嚴數稱之

裴玢五世祖糾本王疏勒武德中來朝拜鷹揚大將軍  
封天山郡公留不去遂籍京兆玢初事金吾將軍論惟  
明為儻力德宗在奉天以功封忠義郡王從惟明鎮廊  
坊署牙將後節度使王栖曜卒中軍將何朝宗夜縱火  
作亂玢獨匿不出遲明禽朝宗以待命有詔并軍司馬  
崔輅斬之以同州刺史劉公濟領節度擢玢為司馬踰

年公濟卒乃授玠節度使元和三年徙山南西道玠為  
治嚴稜畏遠權勢不務貢奉蔬食敝衣居處取避風雨而  
已倉庫完實百姓安之當世將相未有及者以疾辭位  
入朝不事騶仗妻乘竹輿二侍婢黃碧緣服七年卒贈  
尚書左僕射謚曰節

欽定續通志卷二百十七

欽定四庫全書

欽定續通志卷二百十八

列傳

唐十八

郭孝恪

張儉

王方翼

珣

蘇定方

薛仁貴

訥平

嵩從程務挺

王孝傑

唐休璟

張仁愿

王暉

郭孝恪許州陽翟人少有志節隋亂率少年數百附李  
密密喜謂曰世言汝穎多奇士不謬也使與李勣守黎  
陽密敗勣遣孝恪送款封陽翟郡公拜宋州刺史紹興  
勣經畧武牢以東所定州縣委以選補竇建德之援洛  
也孝恪上謁秦王進計曰王世充力竭計窮其面縛可  
跂足待建德志衆遠來糧餉阻絕殆天亡時也若固守  
武牢以軍汜水逐機應變禽殄必矣王然之賊平置酒  
大會洛陽宮語諸將曰孝恪策禽賊王長先下漕功固

在諸君右遷上柱國歷貝趙江涇四州刺史所至有能  
名改左驍衛將軍累加金紫光祿大夫貞觀十六年拜  
涼州都督改安西都護西州刺史其地高昌舊都流徙  
罪人與鎮兵雜處限以沙磧隔絕中國孝恪推誠撫御  
盡得其歡心初王師滅高昌詔以所虜馬者生口七百  
還馬者王王判歸欲谷設可汗孝恪請擊之即拜西州  
道行軍總管率步騎三千出銀山道夜襲其王龍突騎  
支虜之帝悅降璽書褒勞俄拜崑邱道副大總管進討

龜茲破其國城乃自留守遣餘軍分道進龜茲國相那  
利遁去孝恪以餘部未平出營於外國人有謂孝恪曰  
那利素得志今亡在外勢必為變城中頗有異志願公  
備之孝恪忽其言不設備那利果率衆陰與城內胡為  
應薄城鼓譟始覺之乃率千餘人合戰城中舉應那利  
孝恪殊死闘中流矢卒子待詔亦歿將軍曹繼叔進兵  
復拔其城太宗責孝恪斥堠不明至顛覆奪其官後愍  
死戰更為舉哀高宗即位追還官爵贈待詔游擊將軍

贖物三百段次子待封官左豹韜衛將軍咸亨初副薛仁貴討吐蕃戰大非川敗績貸死為民

張儉字師約京兆新豐人隋相州刺史晚城郡公威孫父植車騎將軍連城縣公儉高祖從外孫也

舊書作從甥高

祖起儉以功除右衛郎將遷朔州刺史時頡利可汗方強每有求取所遺書輒稱詔敕邊吏奉承不敢卻及儉獨拒不受大赦民營田歲收穀數十萬斛雖霜旱勸百姓相賑贍免飢殍州以完安李靖既平突厥有思結部

者窮歸于儉儉受而安輯之其在磧北者親戚私相過  
省儉不禁示羈縻而已儉徙勝州後將不察其然遽奏  
思結叛朝廷議進討時儉以母喪奪服為使者撫納之  
儉單騎入其部召酋帥慰諭推腹心咸匍匐歸命因舉  
從代州遂檢校代州都督儉勸墾田力耕歲數稔私蓄  
富實儉恐虜易驕乃建平糴法入之官虜悅喜由是儲  
斛流贏遷營州都督兼護東夷校尉坐事免詔白衣領  
職營州部與契丹奚靺鞨諸蕃切畛高麗引衆入寇



儉率兵破之俘斬畧盡復拜營州都督太宗將征遼東  
遣儉率蕃兵先進畧地至遼西川漲久未度帝以為畏  
懦召還見洛陽宮陳水草美惡山川險易并久不進狀  
帝悅拜行軍總管使領諸蕃騎為六軍前鋒時高麗侯  
者言莫離支且至帝詔儉自新城路進擊虜不敢出儉  
進度遼趨建安城破賊斬數千級累封曉城郡公後改  
東夷校尉官為都護府即以儉為都護永徽初加金紫  
光祿大夫卒年六十謚曰密儉兄大師太僕卿華州刺

史武功縣男弟延師左衛大將軍范陽郡公性謹畏典羽林兵三十年未嘗有過卒贈荊州都督謚曰敬陪葬昭陵儉兄弟三人門皆立戟時號三戟張家

王方翼字仲翔并州祁人祖裕隋州刺史尚同安大長公主官開府儀同三司卒謚曰文方翼早孤哀毀如成人時號孝童母李為主所斥居鳳泉墅方翼尚幼雜庸保執苦不棄日墾田植樹治林垠墜完墻屋燎松丸墨為富家主薨還京師嘗夜行見長人丈餘引弓射仆之

乃朽木也太宗聞擢右千牛高宗立而從祖女弟為皇  
后調安定令誅滅大姓姦豪脅息徙瀚海都護司馬坐  
事下遷朔州尚德府果毅歲餘代還居母喪哀瘠甚帝  
遣侍醫療視其友趙持滿誅死尸諸道親戚莫敢視方  
翼曰樂布哭彭越義也周文王掩骼仁也絕友義蔽主  
仁何以事君遂往哭其尸具禮收葬金吾劾繫帝嘉之  
不罪再遷肅州刺史州無隍塹寇易以攻方翼乃發卒  
建樓堞廝多樂水自環烽邏精明儀鳳間河西蝗獨不

至方翼境而他郡民或餒死皆重繭走方翼治下乃出  
私錢作水磴薄其贏以濟飢瘵構舍數十百楹居之全  
活甚衆芝產其地裴行儉討遮旬奏為副兼檢校安西  
都護徙故都護杜懷寶為庭州刺史方翼築碎葉城面  
三門紆還多趣以詭出入五旬畢西域胡縱觀莫測其  
方畧悉獻珍貨未幾徙方翼庭州刺史而懷寶自金山  
都護更鎮安西遂失蕃戎之和永淳初十姓阿史那車  
薄啜叛圍弓月城方翼引軍戰伊麗河敗之斬首千級

俄而三姓咽麪兵十萬踵至方翼次熱海進戰矢著臂  
引佩刀斷去左右莫知所部雜虜謀執方翼為內應方  
翼悉召會軍中厚賜以次出壁外縛之會大風雜金鼓  
而號誨無聞者殺七千人即遣騎分道襲咽麪等皆驚  
潰烏鵲引兵遁去禽首領突騎施等三百人西戎震服  
初方翼次葛水暴漲師不可度沈祭以禱師涉而濟又  
七月次葉河無舟而冰一昔合時以為祥西域平以功  
遷夏州都督屬牛疫民廢田作方翼為耦耕法張機鍵

力省而見功多百姓順賴明年召方翼議西域事引見奉天宮賜食帝前帝見衣有汙濯處問其故具對熱海苦戰狀視其創帝咨嗟久之賜賚良厚俄而妖賊白柵余以綏州反詔方翼與程務挺討之飛殄擊賊火其柵平之封太原郡公阿史那元珍入寇被詔進擊時庫無完鎧方翼斷六板畫虎文鉤聯解合賊馬忽見奔駭遂敗獲大將二因降喪乾舍利二部武后時王后屬無在者方翼自視功多冀不坐而后內欲因罪除之未得也

及務挺被殺即并坐方翼追入朝捕送獄流崖州卒於  
道年三十六神龍初復官爵方翼善書與魏叔琬齊名  
子珣字伯玉與兄璵弟璿以文學稱時號三王天授初  
珣及進士第應制科遷藍田尉以拔萃擢長安尉因進  
見武后召問刑政嘉之詢其族氏對曰廢后臣之姑也  
后不悅左遷亳州司法參軍神龍初為河南丞武三思  
矯制貶臨川令宋璟輔政召授侍御史出許州長史歲  
旱珣時假刺史事開廩振民即自劾玄宗赦之累遷工

部侍郎而璿至中書舍人珣嘗為秘書少監數年而璿繼職終右散騎常侍卒贈戶部尚書謚曰孝子錡天寶中厯右補闕殿中侍御璿子鉉自有傳

蘇烈字定方以字行冀州武邑人後徙始平父邕當隋季率里中數千人為本郡討賊定方驍悍有氣決年十五從父戰數先登陷陣邕卒代領其衆破劇賊張金稱楊公卿追北數十里自是賊不入境鄉黨賴之貞觀初為匡道府折衝從李靖襲突厥頡利於磧石率二百騎



為前鋒乘霧行去賊一里許霧霽見牙帳馳殺數十百人頡利及隋公主惶窘各遁去靖亦尋至餘黨悉降再遷左衛中郎將與程名振討高麗破之拜右屯衛將軍臨清縣公從程知節征賀魯至鷹娑川賀魯率二萬騎來拒總管蘇海政連戰未決鼠尼施等復引二萬騎為援定方始休士見塵起率精騎五百踰嶺馳擣賊營賊衆大潰殺千餘人所棄鎧仗牛馬藉藉山野不可計副總管王文度疾其功謬謂知節曰賊雖走軍死傷者衆

今當結陣外向置輜重於中人馬被甲賊來即戰是謂萬全又矯稱別奉聖旨以知節恃勇輕敵使文度節制遂收軍不許深入於是馬癰卒勞無聞志定方說知節曰天子詔討賊今反自守何功之立且公為大將而閫外之事不得專顧副將乃得專之理必不然胡不囚文度待天子命不從至怛篤城有胡人降文度又曰比我師還此輩復作賊不如殺之取其貲定方曰此乃自作賊耳及分財定方一不取高宗知之

吳鎮科膠曰此乃高宗顯慶元

年事新書作  
太宗誤今改

比知節等還悉下吏當死貸為民擢定

方伊麗道行軍大總管復征賀魯以任雅相回紇婆潤  
為副出金山北先擊處木昆部破之俟斤嬾獨祿擁眾  
萬帳降定方撫之發其千騎并回紇萬人進至曳咥河  
賀魯率十姓兵十萬拒戰輕定方兵少舒左右翼包之  
定方令步卒據高攢稍外向親引勁騎陣北原賊三突  
步陣不能入定方因其亂擊之鏖戰三十里斬首數萬  
級賊大奔明日振兵復進五弩失畢舉眾降賀魯獨與

處木昆屈律吸數百騎西走定方令副將蕭嗣業回紇  
婆潤率雜虜兵趨邪羅斯川追北定方與雅相領新附  
兵絕其後會大雪吏請少休定方曰虜恃雪方止舍謂  
我不能進若縱使遠遁則莫能禽遂勒兵進至雙河與  
彌射步真合距賀魯所百里下令陣而行薄金牙山賀  
魯將畋定方縱擊破其牙下數萬人悉歸所部賀魯走  
石國彌射子元夾以兵與嗣業會縛賀魯以還由是修  
亭障列蹊隧定疆畛問疾收齒唐之州縣極西海矣高

宗臨軒定方戎服奉賀魯以獻策功拜左驍衛大將軍  
那國公別封子慶節為武邑縣公會思結闕俟斤都曼  
先鎮諸胡初所部及疏勒朱俱波喝槃陀三國復叛詔  
定方還為安撫大使率兵至葉葉水而賊保馬頭川定  
方選精卒萬人馬三千襲之晝夜馳三百里至其所都  
曼驚戰無素遂大敗走馬保城師進攻之都曼計窮遂  
面縛降俘獻於乾陽殿有司請論如法定方頓首請曰  
臣向諭陛下意許以不死願丐其命帝曰朕為卿全信

乃宥之葱嶺以西遂定加食邢州鉅鹿三百戶遷左武衛

大將軍出為神丘道大總管

通鑑考異云舊書定方傳新羅傳皆云定方為熊津

道大總管今從此年  
實錄及新唐書本紀

率師討百濟自城山濟海至熊津

口賊瀕江屯兵定方出左涯乘山而陣與之戰賊敗死

者數千王師乘潮而上舳艫銜尾進鼓而譟定方將步

騎夾引直趨真都城賊傾國來酣戰破之殺虜萬人乘

勝入其郛王義慈及太子隆北走定方進圍其城義慈

子泰自立為王率眾固守義慈之孫文思曰王與太子出

而叔豈得擅為王若王師還我父子安得全遂率左右  
縋城下人多從之泰不能止定方使士登城建唐旗幟  
於是泰開門請命其將禍植與義慈降隆及諸城送款  
百濟悉平俘義慈隆泰等獻東都定方所滅三國皆生  
執其王賞賚珍寶不勝計加慶節尚輦奉御未幾定方  
為遼東道行軍大總管俄徙平壤道破高麗之衆於涓  
江奪馬邑山為營遂圍平壤會大雪解圍還拜涼州安  
集大使以定吐蕃吐谷渾乾封二年卒年七十六帝悼

之責謂侍臣曰定方於國有功當褒贈若等不言何耶  
乃贈左驍衛大將軍幽州都督謚曰莊

薛仁貴絳州龍門人少貧賤以田為業將改葬其先妻  
柳曰夫有高世之材要須遇時乃發今天子自征遼東  
求猛將此難得之時君盍圖功名以自顯富貴還鄉葬  
未晚仁貴乃往見將軍張士貴應募至安地會郎將劉  
君弼為賊所圍仁貴馳救之斬賊將係首馮鞍賊皆懾  
伏由是知名王師攻安市城高麗莫離支遣將高延壽



等率兵二十萬拒戰倚山結屯太宗命諸將分擊之仁貴恃驍悍欲立奇功乃著白衣自標顯持戟腰鞬兩弓大呼赴賊所向披靡軍乘之賊遂奔潰帝望見遣使馳問先鋒白衣者誰曰薛仁貴帝召見嗟異賜金帛口馬甚衆授游擊將軍雲泉府果毅令北門長上師還帝謂曰朕舊將皆老欲擢驍勇付閫外事莫如卿者朕不喜得遼東喜得卿也遷左領軍中郎將高宗幸萬年宮山水暴至夜突玄武門宿衛皆散走仁貴曰當天子緩急

安可懼死遂登門大呼以警宮內帝遽出乘高俄而水  
入帝寢帝曰賴卿以免始知有忠臣也賜以御馬蘇定  
方討賀魯仁貴上疏曰臣聞兵出無名事故不成明其  
為賊敵乃可服今泥熟為賀魯所破虜係妻子漢兵有  
於賀魯部落轉得其家口者宜悉取以還厚加賚遣使  
百姓知賀魯為暴而陛下至德也帝納之遂還其家屬  
泥熟請隨軍効死顯慶三年詔副程名振經畧遼東破  
高麗於貴端城斬首二千級明年與梁建方契苾何力

遇高麗大將溫沙多門戰橫山仁貴獨馳入所射皆應  
弦仆又戰石城有善射者殺官軍十餘人仁貴怒單騎  
突擊賊弓矢俱廢遂生禽之俄與辛文陵破契丹於黑  
山執其王阿卜固獻東都拜左武衛將軍封河東縣男  
詔副鄭仁泰為鐵勒道行軍總管將行宴內殿帝曰古  
善射有穿七札者卿試以五甲射焉仁貴一發洞貫帝  
大驚更取堅甲賜之時九姓衆十餘萬令驍騎數千來  
挑戰仁貴發三矢輒殺三人於是虜氣懾皆降仁貴慮

為後患悉坑之轉討磧北餘衆禽偽葉護兄弟三人以  
歸軍中歌曰將軍三箭定天山壯士長歌入漢關九姓  
遂哀鐵勒有思結多覽葛等部先保天山及仁泰至懼  
而降仁泰不納虜其家以賞軍賊相率遁去有侯騎言  
虜輜重畜牧被野可往取仁泰選騎萬四千卷甲馳絕  
大漠至仙夢河不見虜糧盡還人飢相食比入塞餘兵  
纔二十之一仁貴亦取所部為妾多納賕遺為有司劾  
奏以功見原乾封初高麗泉男生內附遣將軍龐同善

高俅往慰納弟男建率國人拒擊乃詔仁貴率師為後援同善至新城夜為虜襲仁貴擊之斬首數百級同善進次金山軍敗高麗乘勝進仁貴擊虜斷為二衆即潰斬馘五千拔南蘇木底蒼巖三城遂會男生軍手詔勞勉仁貴負銳提卒二千進攻扶餘城諸將以兵寡勸止仁貴曰在善用不在衆身率士遇賊輒破殺萬餘人拔其城因旁海畧地與李勣軍合扶餘既降它四十城相率送款威震遼海有詔仁貴率兵二萬與劉仁軌鎮平

壤拜本衛大將軍封平陽郡公檢校安東都護移治新城撫孤存老檢制盜賊隨材任職褒崇節義高麗士衆皆欣然忘亡咸亨元年吐蕃入寇命為邏娑道行軍大總管率將軍阿史那道真郭待封擊之以援吐谷渾待封嘗為鄯城鎮守與仁貴等夷及是恥居其下頗違節度初軍次大非川將趨烏海仁貴曰烏海地險而瘴吾入死地可謂危道然速則有功遲則敗今大非嶺寬平可置二柵悉內輜重留萬人守之吾倍道掩賊不整滅

之矣乃約齋至河口遇賊破之多所殺掠獲牛羊萬計  
進至烏海城以待後援待封初不從領輜重踵進吐蕃  
率衆二十萬邀擊取之糧仗盡沒待封保險仁貴退軍  
大非川吐蕃益兵四十萬來戰王師大敗仁貴與吐蕃  
將論欽陵約和乃得還吐谷渾遂沒仁貴歎曰今歲在  
庚午星在降婁不應有事西方鄧艾所以死于蜀吾固  
知必敗有詔原死除名為庶人未幾高麗餘衆叛起為  
鷄林道總管復坐事貶象州會赦還帝思其功乃召見

曰疇歲萬年宮徵卿我且為魚前日珍九姓破高麗爾  
功居多人有言向在烏海城下縱虜不擊以至失利此  
朕所恨而疑也今遼西不寧瓜州路絕卿安得高枕不  
為朕指揮耶於是拜瓜州長史右領軍衛將軍檢校代  
州都督率兵擊突厥元珍於雲州突厥問曰唐將為誰  
曰薛仁貴突厥曰吾聞薛將軍流象州死矣安得復生  
仁貴脫兜鍪見之突厥相視失色下馬羅拜稍稍遁去  
仁貴因進擊大破之斬首萬級獲生口三萬牛馬稱是永



淳二年卒年七十贈左驍衛大將軍幽州都督官給舉  
護喪還鄉里

子訥字慎言起家城門郎遷藍田令富人倪氏訟息錢  
於肅政臺中丞來俊臣受賕發義倉粟數千斛償之訥  
曰義倉本備水旱安可絕衆人之仰私一家報上不與  
會俊臣得罪亦止後突厥擾河北武后以訥世將詔攝  
左威衛將軍安東道經畧使對同明殿具言醜虜馮暴  
以廬陵王藉言今雖還東宮衆未堅信若此命不易賊

不討而解后納其言俄遷幽州都督安東都護改并州  
長史檢校左衛大將軍訥久處邊有戰功開元初玄宗  
講武新豐詔訥為左軍節度時諸部頗失序唯訥與解  
琬軍不動帝令輕騎召之至軍門不得入禮成尤見慰  
勞明年契丹奚突厥連和數入邊訥建議請討詔監門  
將軍杜賓客定州刺史崔宣道與訥帥衆二萬出檀州  
賓客議方暑士負戈羸糧深入寇境慮無功姚元崇亦  
持不可訥獨曰夏草薦茂羔犢方息不費饋饟因盜資

振國威靈不可失也天子方欲夸威四夷喜奇功乃聽  
訥言而授紫微黃門三品以重之師至灤河與賊遇諸  
將不如約為虜覆盡亡其軍訥脫身走而罪宣道及大  
將李思敬等八人有詔斬以徇獨賓客免盡奪訥官爵  
俄而吐蕃大酋奎達延乞力徐等衆十萬寇臨洮入蘭  
州剽牧馬詔訥白衣攝羽林將軍為隴右防禦使與王  
暖擊之追及賊戰武階驛犄角擊之破其衆尾北至洮  
水又戰長城堡殺虜數萬禽其酋六指鄉彌洪悉收所

掠及杖械不貲時帝欲自將北伐及訥大克乃止行命  
紫微舍人倪若水即軍陟功狀拜訥左羽林大將軍復  
封平陽郡公以子暢為朝散大夫又授涼州鎮軍大總  
管赤水建康河源邊州皆隸節度俄為朔方行軍大總  
管久之以老致仕卒年七十二贈太常卿謚曰昭定訥  
性沉勇寡言其用兵臨大敵益壯弟楚玉開元中為范  
陽節度使以不職廢生子嵩

嵩生燕薊間氣豪邁不肯事產利以膂力騎射自將豫

安祿山亂晚為史朝義守相州僕固懷恩破朝義長驅  
河朔嵩震懼迎拜軍門懷恩釋之奏為檢校刑部尚書  
相衛洺邢等州節度使方大亂後人亦厭禍嵩謹奉職  
頗有治名大厯初封高平郡王實封二百戶號其軍為  
昭義遷檢校尚書右僕射更封平陽七年卒贈太保詔  
其弟寧知留後事累加檢校太子少師十年為其將裴  
志清所逐以兵歸田承嗣寧奔洺州清入朝降服待罪  
銀臺門赦之乃分其地以嵩族子擇為相州刺史雄衛

州刺史堅涪州刺史承嗣誘雄亂不從遣客刺殺之初  
嵩好蹴鞠隱士劉綱勸止曰為樂甚衆何必乘危邀譽  
刻歡嵩悅圖其形坐右嵩子平

平字垣塗年十二為磁州刺史父喪軍吏以故事脅知  
留務偽許之而而讓岑夕以喪歸累授右衛將軍宿衛  
三十年宰相杜黃裳擢為汝州刺史治有風績王師討  
蔡繇左龍武大將軍授鄭滑節度使數戰有功始河溢  
瓠子東汎滑距城纔二里所平按求故道出黎陽西南

因命其左裴弘泰往請魏博節度使田弘正弘正許之  
乃籍民田所當者易以他地疏道二十里以驪水悍還  
墾田七百頃於河南自是滑人無患入為左金吾衛大  
將軍未幾復帥鄭滑李師道平詔分淄青齊登萊五州  
為平盧軍徙平為節度使王庭湊圍牛元翼棣州危詔  
平出援平遣將李叔佐率兵二千往刺史王稷餽陋  
狹衆潰而歸推突將馬士端為帥劫屯士萬人薄州堞  
城中兵寡平悉公帑家貲募銳卒二千迎戰以奇兵掩

賊輜重賊狼顧遂大敗降餘黨平引謀亂者二千人斬  
堂皇下脅從皆縱還田里威震一方詔遷檢校尚書右  
僕射封魏國公在鎮六年兵鎧完礪徭賦均一寶厯初  
入朝民鄣路願留數日得出拜檢校司空河中絳隰節  
度使復得隸晉慈二州益兵三千進檢校司徒更封韓  
台拜太子太保以司徒致仕卒年八十贈太傅

子從字順之以蔭授左清道率府兵曹叅軍累遷汾州  
刺史隄文谷瀘河二水引溉公私田汾人利之徙濮州



儲粟二萬斛以備凶災於是山東大水詔右司郎中趙  
櫟為賑卹使櫟表其才擢將作監終左領軍衛上將軍  
贈工部尚書

程務挺洺州平恩人父名振隋大業末仕竇建德為普  
樂令盜不跡境俄棄賊自歸高祖詔授永寧令使率兵  
經畧河北即夜襲鄴縣俘男女千餘人以歸去數舍閱  
婦人方乳者九十餘人還之鄴人感其仁劉黑闥陷洺  
州名振與刺史陳君賓自拔歸母妻為賊所得名振率

衆千餘掠冀貝滄瀛等州邀擊糧道悉毀賊水陸餉具  
黑闥怒殺其母妻賊平請手斬黑闥以其首祭母拜營  
州長史封東平郡公賜物二千段黃金三百兩轉洺州  
刺史太宗征遼東召問方畧不合旨帝勃然詰之名振  
辯對益詳帝意解謂左右曰房玄齡常在朕前見朕嗔  
餘人色不能主名振生平未識我一旦誚讓而辭吐不  
屈奇士哉拜右驍衛將軍平壤道行軍總管攻沙卑城  
破獨山陣皆以少擊衆號為名將遷營州都督兼東夷

都護擊高麗於貴端水焚其新城厯晉蒲二州刺史鏐  
方道總管卒贈右衛大將軍謚曰烈務挺少從父征討  
以勇力聞拜右領軍衛中郎將破突厥六萬騎於雲州  
會偽可汗阿史那伏念叛總管李文暕等三將以次奔  
敗詔裴行儉討之以務挺副檢校豐州都督時伏念屯  
金牙山務挺與副總管唐玄表引兵赴之伏念懼乃間  
道降於行儉故裴炎以為非行儉功遷務挺右武衛將  
軍封平原郡公綏州部落稽白鐵余據城平叛建偽號

署置百官進攻綏息大斌殺官吏火區舍詔務挺與夏  
州都督王方翼討之務挺生禽白鐵余進左驍衛大將  
軍檢校左羽林軍嗣聖初與右領軍大將軍張虔勗等  
豫廢中宗立豫王為皇帝累被褒賚以左武衛大將軍  
為單于道安撫大使禦突厥務挺善綏御士服其威愛  
突厥憚之不敢盜邊裴炎下獄務挺密表申治又素與  
唐之奇社求仁善或言務挺與炎及徐敬業潛相援結  
后遣左鷹揚將軍裴紹業即軍中斬之籍其家突厥聞

務挺死率相慶為立祠每出師輒禱焉

王孝傑京兆新豐人少以軍功進儀鳳中劉審禮討吐蕃孝傑以副總管戰大非川為虜執贊普見之曰貌類吾父故不死歸之武后時為右鷹揚衛將軍孝傑居虜中久悉其虛實長壽元年為武威道總管與阿史那忠節討吐蕃克龜茲于闐疏勒碎葉等城武后曰貞觀中西境在四鎮其後不善守棄之吐蕃今故土盡復孝傑功也乃遷左衛大將軍進夏官尚書同鳳閣鸞臺三品

清源縣男證聖初復為朔方道總管與吐番戰不利免  
會契丹李盡忠等叛有詔起白衣為清邊道總管將兵  
十八萬討之軍至東硤石谷與賊接道隘虜衆孝傑率  
銳兵先驅出谷整陣與賊戰而後軍總管蘇宏暉以其  
軍退援不至為虜所乘軍潰孝傑墮谷死士相蹂且盡  
時張說以管記還白狀具陳孝傑乃心國家敢深入以  
少當衆雖敗功可錄也乃贈夏官尚書耿國公以其子  
無擇為朝散大夫遣使者斬宏暉使未至而宏暉已立

功遂贖罪

唐璿字休璟以字行京兆始平人曾祖規為後周驃騎大將軍休璟少孤受易於馬家運傳禮於賈公彥舉明經高第為吳王府典籤改營州戶曹參軍會突厥誘奚契丹叛都督周道務以兵授休璟破之於獨護山數載多遷朔州長史永淳中突厥圍豐州都督崔智辯戰死朝廷議棄豐保靈夏休璟以為不可上疏曰豐州控河過寇號為襟帶自秦漢以來常郡縣之土田良美宜耕

牧隋季喪亂不能堅守乃遷就寧慶戎羯交侵始以靈夏為邊界貞觀末募人以實之西北一隅得以完固今而廢之則河傍地復為賊有而靈夏亦不足自安非國家利也高宗從其言垂拱中遷安西副都護會吐蕃破焉耆安西道大總管韋待價等敗休璟收其潰亡以定西土授靈州都督乃陳方畧請復四鎮武后遣王孝傑拔龜茲等城自休璟倡之聖歷中授涼州都督右肅政御史大夫持節隴右諸軍副大使吐蕃大將麴莽布支



率騎數萬寇涼州入洪源谷休璟以兵數千臨高望之  
見賊旗鎧鮮明謂麾下曰吐蕃自欽陵死贊婆降莽布  
支新將兵欲以示武且其下皆貴臣酋豪子弟騎雖精  
不習戰吾為諸君取之乃被甲先登六戰皆克斬二將  
獲首二千五百築京觀而還吐蕃來請和既宴使者屢  
覘休璟后問焉對曰洪源之戰是將軍多殺臣士卒其  
勇無比今願識之后嗟異擢右武威金吾二衛大將軍  
西突厥烏質勒與諸蕃不和舉兵相攻安西道閉武后

詔休璟與宰相計議不少選畫所當施行者既而邊州  
建請屯置盡如休璟策后曰恨用卿晚進拜夏官尚書  
同鳳閣鸞臺三品后誚楊再思李嶠姚元崇等曰休璟  
練知邊事卿輩十不當一改太子右庶子仍知政事會  
契丹入塞復以夏官尚書檢校幽營等州都督安東都  
護時中宗為皇太子休璟將行進啟曰易之兄弟恩寵  
過幸數入禁閫非人臣所宜願加防察帝復位召授輔  
國大將軍同中書門下三品酒泉郡公謂曰初欲召公

計事以有北狄憂前日直言今未忘也加特進尚書右  
僕射賜邑戶三百封宋國公是歲大水上疏自劾免不  
許累遷檢校吏部尚書景龍二年致仕未幾復起為太  
子少師同中書門下三品監修國史景雲初以特進為  
朔方行軍大總管備突厥停舊封別賜百戶明年復請  
老給一品全祿延和元年卒年八十六贈荊州大都督  
謚曰忠休環以儒者號知兵自碣石踰四鎮其間縣地  
幾萬里山川夷坦郭塞之要皆能言之故行師料敵未

嘗敗初得封以賦絹數千散賙其族又出財數十萬大為塋墓盡葬其五服親當時稱重惟張仁愿議築受降城而休璟獨謂不可卒託之而漠南無虜患始致仕已踰八十猶託倚權近求復用於是賀婁尚官方用事附者輒榮赫休璟乃為子娶其義女故復起宰相頗為時所譏其當國亦無他毗益云子先慎至陳州刺史先擇為右金吾衛將軍

張仁愿華州下邽人本名仁亶以睿宗諱音近避之有

文武材武后時累遷殿中侍御史御史郭弘霸者

舊書作郭

霸稱后乃彌勒佛身又鳳閣舍人張嘉福王慶之請以

武承嗣為皇太子邀仁愿聯章仁愿正色拒之後王孝  
傑為吐剌軍總管與吐蕃戰不利仁愿監其軍因入言  
狀孝傑坐免擢仁愿侍御史萬歲通天中監察御史孫  
承景監清邊軍戰還自圖先鋒當矢石狀武后歎曰御  
史乃能如是乎擢為右肅政臺中丞詔仁愿即叙其麾  
下功臣愿先問承景破敵曲折承景實不行所問皆窮

仁愿劾奏承景罔上虛列虜級貶為崇仁令以仁愿代  
為中丞檢校幽州都督默啜寇趙定還出塞仁愿以兵  
邀之賊引去夫著其手武后遣使勞問賜藥傳注遷并  
州都督長史神龍中進左屯衛大將軍兼檢校洛州長  
史會穀貴多盜仁愿一切捕殺隋積府門畿甸震懾無  
敢犯先是賈敦頤嘗為長史有政績時人為之語曰洛  
有前賈後張敵京兆三王三年朔方軍總管沙吒忠義  
為突厥所敗詔仁愿攝御史大夫代之既至賊已去引

兵踵擊夜襲其營破之始朔方軍與突厥以河為界北  
厓有拂雲祠突厥每犯邊必先謁祠禱解然後料兵度  
河時默啜悉兵西擊突騎施娑葛仁愿請乘虛取漠南  
地於河北築三受降城絕虜南寇路唐休璟以為兩漢  
以來皆北守河今築城虜腹中終為所有仁愿固請中  
宗從之表留歲滿兵以助功咸陽兵二百人逃歸仁愿  
禽之盡斬城下軍股慄役者盡力六旬而三城就以拂  
雲為中城南直朔方西城南直靈武東城南直榆林三

壘相距各四百餘里其北皆大磧也斥地三百里而遠  
又於牛頭朝那山北置烽堠千三百所自是突厥不敢  
踰山牧馬朔方益無寇歲捐費億計減鎮兵數萬初建  
三城也不置壘門曲敵戰格或曰邊城無守備可乎仁  
愿曰兵貴攻取賊退守寇至當併力出拒敢回望城者  
斬何事守備退怛其心哉後常元楷代為總管始築壘  
門議者益重仁愿而輕元楷景龍二年拜左衛大將軍  
同中書門下三品封韓國公春還朝秋復督軍備邊帝



為賦詩祖道賞賚不貲遷鎮軍大將軍睿宗立乃致仕  
加兵部尚書廩祿全給開元二年卒贈太子少保仁愿  
為將號令嚴將吏信伏按邊撫師賞罰必直功罪後人  
思之為立祠受降城出師輒享焉宰相文武兼者當時  
稱李靖郭元振唐休璟仁愿云在朔方奏用御史張敬  
忠何鸞長安尉冠汎鄠尉王易從始平主簿劉體微分  
總軍事太子文學柳彥昭為管記義烏尉晁良貞為隨  
機皆著稱後至大官世名仁愿知人子之輔至道州刺

史張敬忠自監察御史累遷吏部郎中開元七年拜平  
盧節度使

王峻滄州景城人後徙洛陽父行果為長安尉知名峻  
弱冠擢明經第調清苑尉歷除殿中侍御史會朔方元  
帥魏元忠討賊不利劾奏副將韓思忠敗律當誅峻以  
思忠偏裨權不已制且其人勇智可惜不宜獨誅固爭  
得釋峻亦出為渭南令景龍末授桂州都督州有兵舊  
嘗仰餉衡永峻始築羅郭罷戍卒堤江水開屯田數千

頃以息轉漕百姓賴之後求歸上冢州人詣闕留有詔  
桂往懼寇暴戶口彫瘵宜即留以須政成在桂踰期年  
州人丐刻石頌德初劉幽求放封州廣州都督周利貞  
必欲殺之道出暖所暖知其故留不遣利貞移書督趣  
幽求懼曰勢且難全正恐累君奈何暖曰公之坐非朋  
友所絕暖在終不忍公無罪就死俄崔湜等誅幽求復  
執政故詔幽求為刻石辭遷鴻臚少卿充朔方軍副大  
總管安北大都護豐安定遠等城並受節度進太僕少

卿隴右羣牧使開元二年吐蕃以精甲十萬寇臨洮次大來谷其酋坐達延以兵踵而前峻率所部二千與臨洮軍合料奇兵七百易胡服夜襲去賊五里令曰前遇寇士大呼鼓角應之賊驚疑伏在旁自相鬪死者萬計俄而薛訥至武階距大來二十里賊陣兩軍間亘一舍而近峻往迎訥夜使壯士銜枚塵突虜駭引去追至洮水敗之俘獲如積以功加銀青光祿大夫清源縣男兼原州都督以子班為朝散大夫又進并州都督長史明

年突厥默默為拔曳固所殺其下多降分置河曲既而  
小殺繼立降者稍稍叛去駿上言突厥向以國亂款塞  
降附與部落本無嫌隙今徙處河曲使內伺邊釐久必  
為患比者不受要約兵已屢動擅作烽區閉障行李虜  
脫南牧降帳必與連衡以相應接表裏有敵雖韓彭孫  
吳無所就功請至農隙令朔方軍大陳兵召酋豪告以  
禍福啗以金繒且言南方麋鹿魚米之饒並遣置淮右  
河南寬鄉給之程糧雖一時之勞然不二十年漸服諸

華料以充兵則皆勁卒議者若謂降狄不可以南處則高麗舊俘置之沙漠之曲西域編夷散在青徐之右何獨降胡不可徙與臣復料議者必曰故事置于河曲前日已寧今無獨異且往者頡利破亡邊鄙安定故降戶不生他心今虜未殄滅此降人又皆戚屬固不與往年同臣竊以三策料之悉其部落置內地獲精兵之實避黠虜之患此上策也亭障之下蕃華叅處廣屯戍為備擬費甚人勞下策也置之胡塞滋成亂萌此無策也留

待河水恐即有變書未報而虜已叛乃勅暖將并州兵  
濟河以討之暖間行倍道卷甲捨幕夜趨山谷中遇雪  
盛恐失期仰天誓曰暖若事君不忠不討有罪天所殛  
者當自蒙罰士衆何辜心誠忠而天監之則止雪反風  
以濟戎事須臾雪止時叛胡分二道走暖自東道追及  
之獲級三千以功遷左散騎常侍朔方行軍大總管改  
御史大夫跌跌部及僕固都督勺磨等散保受降城左  
右潛引突厥內擾暖密言上盡誘而誅之拜兵部尚書

復為朔方軍大總管九年蘭池胡康待賓據長泉反陷  
六州詔郭知運與暖討平之封清源公官一子玄宗以  
宮人賜知運等暖獨不敢取曰臣之事君猶子事父詎  
有常近聞掖而臣子敢當乎誓死以免見聽初暖奏朔  
方兵力有餘願罷知運獨當戍未報而知運至故不協  
暖所降附知運輒縱擊賊意暖責已乃復叛暖坐貶梓  
州刺史改太子詹事中山郡公進吏部尚書太原尹代  
張說為兵部尚書同中書門下三品充朔方軍節度大



使河北河西隴右河東之軍盡屬是冬帝親郊追會大  
禮暖以冰壯請留將兵待邊手勅慰免會有人告許州  
刺史王喬謀反辭逮暖詔源乾耀張說雜訊無狀以黨  
與貶蘄州刺史遷定州復以戶部尚書為朔方軍節度使  
卒贈尚書左丞相謚曰忠烈暖氣貌偉特時謂為熊虎  
相感慕節義有古人風其操下肅壹吏人畏愛始二張  
之誣魏元忠暖獨上疏申治宋璟曰魏公全矣子再觸  
逆鱗其殆乎暖曰魏公以忠獲罪苟得辨雖死勿悔暖

卒後信安王禕討奚於幽州告捷且言戰時士咸見暖  
與部將高昭麾兵赴敵天子嗟異戶部郎中陽伯成上  
疏請封暖墓表異之優其子孫帝乃遣使祭暖廟進諸  
子官